

蘇州府志


蘇州府志

卷之四十四
名宦三
卷之四十五
名宦四
卷之四十六
名宦五

九	漢書門
一〇	八
一四	三
三一	二
三二	一
冊架函號類	

十九

元二函六架	內閣文庫
三	番號 漢 9083
二	冊數 32 (19)
冊	函號 292 13



蘇州府志卷第四十四

名宦三

歷代郡守
僚佐附

元

淺草文庫

王都中字元俞福寧州人世祖時授平江路總管府治中時年

甫十七僚吏見其年少頗易視之都中遇事剖析動中宵察


皆聘貽不敢欺崑山有詭易官田者事覺而八年不決都中

為披故牘洞見底裏其人乃伏辜吳江有違拒有司築堤護

田之令而歸過於衆人者都中詢知其故皆置不問其人乃

無所逃罪學舍久壞不治而郡守缺都中曰聖人之道人所

共由何獨守得為乎乃首募大家合錢新其禮殿秩滿除浙



蘇州府志 卷四十四 名宦三

東道宣慰副使

元史 按盧王二志皆列都中於人物今考都中雖嘗居吳實非吳人也故移入名宦

趙全趙寧人元初由軍功膺寵下江南授懷遠大將軍湖州路

總管至元二十年改平江在任開耕荒田六百三十餘頃增

戶口至九百七十朔構豐樂嘉會太平安和熙春酒庫二十

三年得代時方內附頑民故犯法者嚴治不少貸若以徭役

受捶者必瞑目歎曰以徵科受罪尚忍加重乎繼除杭州民

泣送不忍捨

盧志

戎益順德人大德元年任總管值歲饑親詣各縣勸率上戶賑

濟得米一萬七千七百餘石民多德之

盧志

董章字文卿真定人大德五年授平江路總管為政廉明至郡

未幾男女異路獄訟鮮少公退不入內闕清坐弦歌每至夜

分作善教二十四條以勸民大抵以厚風俗為急博學尤精

春秋善書大字重創姑蘇驛等題顏皆其筆紫陽方回為記

政績之畧

盧志

祝峒字秀巖

一云碧山

以字行松江人大德間為海道都漕運萬戶

府經歷就陞平江路總管峒為人英拔豪濶篇翰清美同俞

琰學易講治甚精所交多一時名俊與趙孟頫朱德潤氣誼

相許卒於官子孫遂家吳中

姑蘇志

劉允字嗣宗良鄉人積官至山北道廉訪使皇慶二年為平江

路總管發姦摘伏洞燭民隱吏弊若素官南方者臨事執義

不苟懲惡則濟之以猛癯然若不勝衣未嘗疾言遽色素守
清儉門無私謁延祐元年詔經理田糧條令嚴峻事鉅限迫
莫不駭懼公威信素孚人不敢欺昔之詭計者翕然自實時
江浙會十八郡守臣欲概定田賦皆視公言爲從違公毅然
爭曰地有肥磽厥賦宜不齊一旦更改民病何時瘳乎由是
得仍舊貫二年郡境被蝥公白之行省仍屬閩實遂悉蠲之
縣民執役定里正主首有產去稅存之患公建隨產當差之
議役始均科舉初行士赴會試者闢公字歌鹿鳴餞之三年
正月卒喪不能舉僚佐合賻歸葬盧志
師朶列禿一名克恭字敬之寧夏人延祐七年由兵部侍郎遷

平江路總管馳驛到郡先是賈人貨黍草入城匿稅事覺併
及城外餘積行省疑不決列禿謂物不入城不應當匿稅法
悉以還之府縣司未結之案凡二千二百編攝吏曹期以日
決不旬時繁者簡州縣役民充里正主首責以催科陪償往
往破產或本都堪役調之他都吏夤緣爲姦列禿曰詔旨先
田多上戶盡放下戶從上推排不役於他都民便而事易集
在城者曰坊正舊以待闕吏充滿歲補吏其人熟於期會數
十年不改或欲以例役民動搖抑配且失業敗事列禿榜諭
仍役吏屬肆乃安城中酒稅歲額八千定以百八十戶認辦
不均列禿曰擇二十戶可也民出己本營官息則價之高低

隨物貴賤官府用酒亦以見鈔沽買自是絕差認之擾漕府
運糧每歲船戶務多斛面列禿兩平之使客如賜田莊官歲
利其廩給逾年延緩不返列禿禁其濫大飾館舍造學官遇
事中理合宜宜春丞龔璠紀其德政

盧志

道童高昌人自號石巖後至元二年自信州路總管轉平江路
三年夏旱道童暴露祈請雨大澍已而積陰以風稻多虛秕
屬邑上菑狀道童遣僚屬履畝與狀合者無一不讎郡多寓
公喜持短長往時郡守至必伏謁其門聽其言少拂意輒搆
飛語道童至一切繩以法僑者不堪至京言道童妄以歲凶
誑朝廷事聞遣御史乘傳鞠虛實時道童已除江淮財賦都

總管府達魯花赤遂與僚屬逮至嘉興御史廷詰知所言皆
妄乃治言者罪初下車屬邑民訟令不爲直者訴於道童道
童置籍籍民所訴送之邑務得其情訟爲之簡民輸歲賦豪
右屬官吏初限皆細民石加五六斗至末限豪右僅納什四
三而以細民多輸者足之道童令初限必大戶齊足次及細
民徵夏稅絲亦如之推官汪澤民作去思碑謂其持身嚴燭
理明決事敏待人直又謂授宣命於朝者凡十有三歷官多
練事精然家益貧其來平江一無所取可謂大丈夫矣

盧志

汪澤民字叔志婺源人居宣州以進士累遷平江路總管府推
官有僧靜廣與他僧有憾久絕往來一日邀廣飲廣弟子急

欲得師財且苦其箠楚潛往他僧所殺之明日訴官他僧不勝考掠乃誣服三經審錄詞無異結案待報澤民取行克刀視之刀上有鐵工姓名名工問之乃其弟子刀也一訊吐實卽械之而出他僧人驚以爲神

元史

蕭義字仁甫遼人前徽政院斷事官至正八年到任郡歲糧數百萬石長洲尤難辦以土吏積弊侵牟民不堪秋糧每至次年夏初猶未足義廉其故遂拘累年主稅土吏所謂十老人者籍其貲數令其辦認本年秋糧過限不足卽沒其家以償之又禁格各都所設監局每歲一都催糧祇候禁子火家人等一一榜示各令生理依式重造斗斛以漆布之明收什一

爲耗贈倉場不得高下其手土吏畏其令覈畝而徵至十月終三限齊足民皆樂而官免稽違之責其他州縣不令而從咸不失期自奉甚薄疾惡不怨吏胥懾伏時以蕭打鬼稱之

盧志

六十字子約唐兀人以成均上舍釋褐授濠州同知歷江西廉訪副使至正中慎選守令詔廷臣各舉所知或以六十對宰相曰是故同知濠州有德於民者卽奏爲平江路達魯花赤至郡首謁先師飭學宮增弟子員禮聘名師用月書季考之法程試之取中式者補郡曹吏政暇親教誨之諸生爭激昂以明經取進士高第者彬彬焉吳爲東南孔道常賦外又以

蘇州府志 卷四十四
餘供郡邑驛傳之需六十患其病民乃以歲餘官糧變錢爲子母月取其贏以次責曹吏主其費號曰祇待民大稱便時盜入杭州陷常州又陷湖州兵餉誅求絡驛道路朝廷又遣蒙古兵來行省檄令兼制軍事六十申嚴約束盡瘁晝夜十五年行納粟補官之令使者以空名告身至松江知府崔思誠集屬縣大姓抑令入粟不願者加榜掠六十爲使者言吳民困於和糴百需米價騰貴小民艱食實無應募者使者感其言而去先是權酷官止收其稅後公私讌賀更取酒酷戶吏緣爲奸有至破家者六十議罷之在吳六年吳人立石頌德十六年病卒

王志堅府志
稿本陳基碑

俞庸字子中嘉興人爲平江推官年饑穀貴流殍塞途憲府檄庸董倉庾庸上策糴賑全活數萬無何淮兵壓境庸聚勇士守盤門時郡守貢師泰治中高安等舉室以竄亦率庸行庸厲聲叱之曰公等以世臣守大城一旦臨利害先民以逃不顧義與恩耶安持鐵簡擊之仆地遂開門兵至城下庸未甦被擒置馬下頃之甦以計脫去微服間道歸淞上久之大府知其人將授以爵謝之曰吳門之役吾有死所顧繫於亂卒不獲耳尙負面受他命見天日耶因憤病卒年四十五

姑蘇志

明

何質吳元年知蘇州府郡久苦張士誠虐政質勞來安集民慶

更生時詔徙蘇民甚急質雍容裁處民若罔知尤申意庠序
祀殿倫堂已廢皆鼎新之上以為勞民怠事將置極典質曰
殺一郡牧以活百萬生靈質含笑入地矣遂得免復增秩旌
之姑蘇志

金網嘉興人為守時官民田則數不齊上疏請減重額田得罪
賜死姑蘇志

魏觀字杞山蒲圻人洪武五年出知蘇州府前守陳寧苛刻人
呼陳烙鐵觀盡改寧所為以明教化正風俗為治建黌舍聘
周南老王行徐用誠與教授貢穎之定學儀王彛高啓張羽
訂經史耆民周壽誼林文友行鄉飲酒禮政化大行課績為

天下最擢四川行省參知政事未行以部民乞留命還任初
張士誠以蘇州舊治為宮遷舊治於都水行司觀以其地湫
隘還舊治基又濬錦帆涇興水利或譖觀與既滅之基帝使
御史張度廉其事遂被誅帝亦尋悔命歸葬明史

王興宗應天府人洪武七年由懷慶知府調蘇州政尚寬簡愛
民若保赤十年召還除河南布政使姑蘇志

李亨吉安人洪武十年由磨勘司令轉蘇州府經歷復陞知府
性樂易事不苟為為之輒有惠利十一年內艱去民不得留
涕泣送之上賜米五十石鈔二十錠勅曰亨恪慎廉謹以奉
憲章古稱循吏不過是也姑蘇志

湯德高邗人洪武中常州府通判有能名十一年遷守蘇郡敷政嚴明持法不苛吏民畏愛之

姑蘇志

孫蕢字仲衍廣東順德人洪武初為翰林典籍出為平原主簿坐累逮繫釋歸十五年起為蘇州府經歷後復坐累戍遼東後以藍玉黨論死蕢於書無所不窺所著甚富為一時儒宗

云明史

王觀字尚賓祥符人由鄉薦入太學洪武十九年擢知蘇州府公廉有威黠吏錢英屢陷長官觀捶殺之事聞太祖遣行人齎勅褒之勞以御酒時歲大稔民多逋賦部使者督甚急觀置酒延諸富人勸貸貧民償辭指誠懇富人感動逋賦以完

朝廷嘉其能榜以勵天下守蘇者前有李亨魏觀後有姚善

况鍾皆賢稱姑蘇五太守並祀學宮

明史

徐厘字宗實黃巖人洪武時擢蘇州府通判奏發粟二十萬以活饑民春漲病隄厘相度原隰大興築捍之役部使者以為妨農勞民厘言他務誠妨農水不退則田不可耕妨農孰甚焉且今有田者量募貧力飢人得哺正所謂佚道使民曷為勞哉卒就其庸屬邑有樓貞婦奏乞旌表禮部為前朝事不允厘言死生有間則比干之墓誰封禮官不能奪從之官終

兵部侍郎

姑蘇志

蕭鵬舉泰和人以賢良應薦明太祖命賦指佞草應口成篇上

大喜授蘇州府同知以寬厚清慎見稱陞山東鹽運司副使

姑蘇志

林貢字浚仲建德人洪武二十八年以儒士膺薦授蘇州府推

官居官以廉能稱歷大理評事寺副寺正陞開封知府改交

趾卒於官

王志堅府志稿

姚善字克一安陸人洪武三十年遷蘇州知府初太祖以吳俗

奢僭欲重繩以法黠者更持短長相攻訐善為政持大體不

為苛細訟遂衰息吳中大治好折節下士敬禮隱士王賓韓

奕俞貞木錢芹輩以月朔會學宮迎芹上坐請質經義芹曰

此非今所急也善悚然起問芹乃授以一冊視之皆守禦策

時燕兵已南下密結鎮常嘉松四郡守練民兵為備薦芹於

朝署行軍斷事善尋至京師會朝廷以燕王上書貶齊泰黃

子澄於外善言不當貶遂復召二人建文四年詔兼督蘇松

常鎮嘉興五府兵勤王兵未集燕王已入京師時子澄匿善

所約共航海起兵善謝曰公朝臣當行收兵圖興復善守土

與城存亡耳子澄去善為麾下許千戶者縛以獻不屈死年

四十三

明史

湯宗字正傳浙江平陽人建文時為山東按察使坐事左遷刑

部郎中出知蘇州府蘇連歲水民流逋租百餘萬石宗諭富

民出米代輸富民知其愛民不三月悉完納永樂元年有言

其坐視水患者逮下獄謫判祿州後復官南京大理卿明史

江恕漢陽人洪武三十年知崇明縣永樂元年考滿陞刑部主

事士庶赴闕請留擢蘇州府通判仕至台州府知府始蘇志

王番陝西郿人永樂末以鄉舉入太學宣德元年授蘇州府同

知朴實謙和士民宜之以治績陞應天府治中歷官工部尙

書王志堅府志稿

况鍾字伯律靖安人初以吏事尙書呂震竒其才薦授儀制司

主事遷郎中宣德五年帝以郡守多不稱職會蘇州等九府

缺皆雄劇地命部院臣舉其屬之賢能者補之鍾用尙書蹇

義胡濙等薦擢知蘇州賜敕以遣之蘇州賦役繁重豪猾舞

文爲奸利最號難治鍾乘傳至府初視事羣吏環立請判牒

鍾佯不省左右顧問惟吏所欲行止吏大喜謂太守闇易欺

越三日召詰之曰前某事宜行若止我某事宜止若強我行

若輩舞文久罪當死立捶殺數人盡斥屬僚之貪虐庸懦者

一府大震皆奉法鍾乃蠲煩苛立條教事不便民者立上書

言之清軍御史李立勾軍暴同知張徽承風指動以酷刑抑

配平民鍾疏免百六十人役止終本身者千二百四十人屬

縣逋賦四年凡七百六十餘萬石鍾請量折以鈔爲部議所

格然自是頗蠲減又言近奉詔募人佃官民荒田官田準民

田起科無人種者除賦額崑山諸縣民以死徙從軍除籍者

凡三萬三千四百餘戶所遺官田二千九百八十餘頃應減稅十四萬九千餘石其他官田海沒者賦額猶存宜皆如詔書從事臣所領七縣秋糧二百七十七萬九千石有奇其中民糧止十五萬三千餘石而官糧乃至二百六十二萬五千餘石有畝徵至三石者輕重不均如此洪永間令出馬役於北方諸驛前後四百餘匹期三歲遣還今已三十餘歲矣馬死則補未有休時工部征三梭闊布八百匹浙西十一府止百匹而蘇州乃至七百乞敕所司處置帝悉報許當是時屢詔減蘇松重賦鍾與巡撫周忱悉心計畫奏免七十餘萬石凡忱所行善政鍾皆協力成之所積濟農倉粟歲數十萬石

振荒之外以代民間雜辦及逋租其爲政纖悉周密嘗置二簿識民善惡以行勸懲及置通關勘合簿防出納姦僞置綱運簿防運夫侵盜置館夫簿防非理需求興利除害不遺餘力鋤豪強植良善民奉之若神先是中使織造採辦及搆花木禽鳥者踵至郡佐以下動遭笞縛而衛所將卒時凌虐小民鍾在斂迹不敢肆雖上官及他省吏過其地者咸心憚之鍾雖起刀筆然重學校禮文儒單門寒士多見振瞻鍾嘗丁母憂郡民詣闕乞留詔起復正統六年秩滿當遷部民二萬餘人走訴巡按御史張文昌乞再任詔進正三品俸仍視府事明年十二月卒於官吏民聚哭爲立祠鍾剛正廉潔孜孜

愛民前後守蘇者莫能及

明史

李從智宜賓人由進士歷官大理寺正正統十年擢蘇州知府

從智性剛果郡人信巫覡多淫祀署小廟於門交遍衢巷從

智出行見之一日毀去

姑蘇志

朱勝字仲高金華人由舉人累官刑部郎中知封昌府正統十

一年移知蘇州府為人廉靜少欲政尚中和而吏法精練聽

訟不待筮朴物無遁情案無滯牘非重犯不入囹圄胥徒惟

奉行文書隸皂拱列而已嘗曰吏貪吾詞不付房隸卒貪吾

不行杖獄卒貪吾不繫囚在官數年鎮定不撓民安而化之

景泰初擢江西右布政使

姑蘇志

陳信字履信仁和人正統間自大理評事通判蘇州未幾致仕

為人勵名節甘儉泊政多惠愛比歸有懷其德者伺於吳江

道中持金為贖信不受

姑蘇志

楊貢字秉魁樂安人景泰五年以監察御史按蘇時大饑死者

相枕郡邑多缺官巡撫大吏號令煩碎民無所控訴貢獨任

其責殫力拯飭奏免災糧若干萬開倉賑貸天順元年被薦

受敕來守首立惠民倉實粟以備凶歉次發酷吏安純等數

人姦賍政聲赫然持已清嚴疾惡尤甚有豪右藉武臣求私

覲貢捕置於獄摘其賊殺等十餘事將論如法武臣為救解

於巡撫貢欲併舉之更構於朝三年朝遣武臣逮貢與豪赴

蘇州府志 卷四十四 三
錦衣獄置對貢不勝困苦遂誣服勒歸田里遠近寃之

姑蘇志

按豪右者常熟人
錢聘也事見雜記

姚堂字仲升慈谿人進士天順三年以廣信知府服闋吏部尚書姚夔知其賢上疏卽家起知蘇州堂至節省羨餘以萬計興學養士賑孤舉遺襃表名賢以禮化俗先是豪勢人道蘇輒厚索堂下令驛廩之外不加毫末羣情大悅會以事忤巡撫劉孜乃移堂知鎮江而以鎮江知府林鶚互易之牒至卽日行什器帷帳一無所攜夙釀酒一缸以爲蘇物戒守舍者留候林爲用民擁轍遮留不可得乃脫其履懸郡門以表去思相與謠曰雙木作篙不如一搖士林頌之以詩有袖歸白

璧元無玷移去寒梅不改香之句後以鎮江考最擢廣東參

政卒

王志堅府志稿

林鶚字一鶚黃巖人自鎮江移知蘇州動由禮法衛身甚嚴雅

好文學以儒飾吏未嘗爲上官一屈膝對吏民言必涉經史

威儀肅然八年復以劉孜薦擢江西按察使

姑蘇志明史作浙江太平人

云鶚在蘇州先聖像剝落鶚曰塑像非古也昔太祖於國學用木主命改從之又鄭曉名臣記曰鶚知府時一切簡靖卽有建草必審覈再三吳人重其名旦夕責效頗笑守迂緩已而見其深思曲算圖久遠利卽又稱太守康濟才也

邢宥字克寬文昌人天順中爲台州知府坐累謫晉江丞憲宗

復其職改知蘇州姦民攬納秋賦置之法得其贓萬緡以隄沙河整官道大水民飢不待奏輒發米二十萬斛以賑宥素

廉介及治蘇嚴而不苛巡撫宋傑薦於朝詔加浙江左參政仍理府事賜堊書居半歲遂以右僉都御史代傑巡撫江南

明史

王貴字仲顯昌黎人天順四年以歲貢任蘇州同知清靜寡欲臨事自盡職清兵籍惟求民不冤濫未嘗以上官喜怒為意

成化初遷慶陽知府去民多思之有善政錄

姑蘇志參王
志堅志稿

賈奭字希召巴縣人以御史巡按南畿有聲成化四年擢知府事臨政不事更張方嚴端肅人望而畏之操守始終不渝八年以憂去官至副都御史

姑蘇志

邱霽字時雍鄱陽人舉進士除刑部主事成化壬辰來守郡性

穎利彊記意度恢廓初郡學門傍啓行者經文廟中霽乃買

民地直學宮闢門遷驛於胥門規模顯敞又仿冠祭射禮儀

目秩然命諸生習行之浚沮淤以利田歉歲請減稅十二凡

所務力行無所回卻治未一年諸廢畢舉然性頗侈汰家人

少戢竟以流言罷歸

姑蘇志

華清字廉卿應城人成化八年以進士除蘇州府推官剛正不

阿民共賴之未幾去位

王志堅
府志稿

賀霖字時望鄱陽人舉進士弘治元年以御史擢知蘇州府居

官廉慎不激不隨性儉素客過未嘗設宴不得已則出俸錢

具雞黍對食每旦升堂治事輒封閉衙宅鞠訟雖小罪必據

蘇州府志 卷四十四
律立案無以意專斷者故事歲首迎春務逞華靡所費動逾千金至是盡屏之未期年以勞瘁致疾雖在告猶強起處分既卒囊無餘財妻子貧窶而歸

孟俊咸寧人舉人成化十八年先以御史巡按蘇松弘治二年擢知府政尚嚴猛同僚相見如事上官門禁非白請不得出入痛繩奸吏鈎校累年沉匿錢糧文書一旦盡出凡豪猾蠹官帑者皆拘身鬻產盡價而後已終歲所清十七八吏畏之如神明會丁憂去所積措置餘銀萬兩悉返諸官無私焉

林廷獻吳川人弘治九年由永嘉知縣陞蘇州同知勤敏有才幹奉身廉約嘗部糧至京師畢事而歸於民無借貸郡委監造夏周二公祠不兩月堂廡門垣裝治皆具而費銀纔六百星又嘗奉巡撫檄清理崇明沙田產丈量宿弊盡革後遂遵用其規甫三載以憂去

倪文烜建寧人弘治五年任蘇州通判尋以憂去十年再任十二年陞同知居官以廉自矢性仁慈以事笞下先爲墮淚有疑獄必矢於天以決巡歷屬縣秋毫無取在任十六年清白如一進四品階致仕

曹鳳字鳴岐新蔡人成化辛丑進士弘治十年以御史擢蘇州知府首置義冢以畀貧者而禁其火葬定婚喪禮不得過制凡餞迎時序一切務從儉省違者罪之門無私謁不受請託

毀淫祠逐倡優禁賭博政平訟理已未入覲宰臣奏賜宴賢有司於庭鳳與焉尋陞山西參政官至延綏巡撫

徐讚字朝儀永康人弘治乙丑進士正德十一年以御史擢知蘇州府抑奢麗剔蠹弊課士惠民百務釐舉宸濠之變治兵給餉有勞加河南右參政仍掌府事嘉靖元年遷江西左參政在蘇七載民歌頌之官至工部侍郎

劉天和字養和麻城人正德戊辰進士為御史以忤中官廖堂謫金壇丞再遷蘇州同知大盜湯毛九等起孝豐山中蘇為蹂躪臺臣用天和謀遂平之擢知湖州府仕終兵部尚書贈少保

舒瑞字天祥玉山人嘉靖元年以鄉舉任蘇州通判三吳災民

多逋賦瑞設法催科蠲其常例民困得蘇以忤上官調判邵

武歷南雄同知並有惠政

以上俱王志堅府志稿

胡纘宗字世甫秦安人正德戊辰進士嘉靖二年自安慶知府

移守蘇州初至馭下甚嚴繼以寬大覈民田稅籍胥吏額外

私加者悉從罷革凡十三萬有奇白銀金花視正稅之輕重

以為多寡民苦力役長賦尤甚纘宗隨宜調劑在郡才敏風

流前後罕儷興學造士多所甄拔觴詠留題徧滿湖山泉石

閒居五年擢山東左參政累官副都御史巡撫河南

王志堅府志稿

參列朝詩集

聶豹字文蔚吉安永豐人正德丁丑進士嘉靖九年以御史出知蘇州敦尚教化繪二十四孝事於壁以風百姓督士子行冠射禮於學宮常至學道書院講良知之學尋以艱歸後歷兵部尙書贈少保諡襄毅

史立模字季弘餘姚人進士嘉靖九年以兵科給事中外謫陞蘇州通判政尙威嚴以法繩豪武使不得逞所至登眺多作詩歌甫一載遷袁州同知歷惠州知府

李珣清平衛人進士嘉靖十一年知蘇州府謙恭愛下不事煩苛惟嚴馭吏每抱成案請僉必詳閱可否稍有出人卽予重懲常熟俗喜告訐構巧狀珣痛抑之斷獄公明不徇權勢禁

約奢靡廉聲遠聞會清軍御史錢學孔出按太平衛珣不往

謁奏調南康知府

以上俱王志
堅府志稿

王儀字克敬文安人嘉靖中以御史巡按河南發趙府輔國將軍祐棕殺人劫斂罪出爲蘇州知府甫三月祐棕潛入都訐儀誣奏坐除名蘇州士民走闕下乞留帝不許旣而薦起知撫州蘇民復走闕下乞還儀至再不報歸懇於巡撫侯位位以聞帝乃許之至則歎曰蘇賦當天十什二而田額消無可考何以定賦乃履畝丈之使縣各爲籍以八事定田賦以三條核稅課徭役雜辦維均治爲知府第一進浙江副使飭蘇松常鎮兵備時巡撫歐陽鐸均田賦儀佐之以治蘇者推行

於旁郡遷山西右參政

明史蘇州舊志云所謂八事者一曰以原額稽其始二曰以事故除其

虛三日以分項別其異四曰以歸總正其實五曰以坐派起其運六曰以運餘撥其存七曰以存餘考其積八曰以徵一定其則及商稅酒醋房地魚課一切清理凡錢糧諸弊自周忱况鍾之所未除者儀悉除之

王廷字子正南充人嘉靖十一年進士授御史劾吏部尚書汪

鉞謫官歷蘇州知府有政聲人比之趙清獻累遷左都御史

直節勁氣始終無改卒諡恭節

明史

徐節字和卿臨汾人以進士知泰安州有聲嘉靖己未遷蘇州

府同知考滿進知府剗刷宿弊里豪大姓兼并貧下及胥吏

作姦者盡繩以法獄訟盈庭片言決遣置學田以贍諸生在

蘇六年百度振舉士民德之甲子擢淮徐道副使萬曆己卯

復以按察使治兵蘇松當倭警後練軍實裁冗費抑貪暴整

飭一新踰年進陝西布政使

蔡國熙字夢羲永年人嘉靖己未進士隆慶丁卯自戶部郎中

出知蘇州以吳俗浮靡躬行儉約下禁約二十七章採古今

賢哲懿行數十事為圖於府治兩廡定婚喪禮禁民間奢僭

及焚屍者置義冢於六門各百畝建中吳書院以課士時民

間困於賦役而白糧南北運役尤重國熙定為編僉糧長法

革舊役開報之弊白糧則奏定稅額南北運則議助役法他

如府州縣總書不用大戶金花委官領解不以累民減京料

解戶及水夫厰夫門皂革里役舖行善政甚多戊辰入覲以

蘇州府志 卷四十四 名宦三
治行尤異賜宴明年秋御史按吳國熙以議不合投劾去辛未復故官尋擢副使備兵蘇松先是國熙去郡時以南北運役處置猶未善爲憾至是參輿論更役米爲役銀隨糧帶徵因役重輕各有所給又奏請以水利責成巡撫已改山西督學又改固原兵備罷歸卒

王貽德字師禹全州人進士隆慶五年任蘇州同知禔躬廉事上無屈節聽訟剖決如流雖年少不異老吏越三載遷刑部員外郎歷貴州參政

以上俱王志堅府志稿

石崑玉黃梅人萬歷庚辰進士十八年由戶部郎中出守蘇州孤行一意而能惠下按治豪橫剖析獄訟輿論翕服踰年調

去所攜圖書三篋而已嘗語郡人伍袁萃曰吳郡脂膏地無論染指卽重入而輕出亦足饒矣吾不爲也後至副都御史孫成泰平湖人萬歷丁丑進士先爲蘇州同知以廉介稱二十三年擢知府下車日卽請祀袁安節於學宮嚴御史役訊獄必盡其情惡吳俗好佚游虎邱諸山嚴爲之禁偶與上官忤遂拂衣歸

以上二人本史兆斗表微錄

朱燮元字懋和山陰人萬歷中授大理寺評事出守蘇州治務簡易不事深刻人莫敢欺時郡丞及推官皆朱姓有政聲人稱三朱而燮元爲最尤長於知人季試拔姚希孟汪起鳳後皆爲名臣

舊府志

蘇州府志 卷四十四 名宦三
李右諫字袞思豐城人萬歷進士癸卯以南禮部郎中出守蘇州丁未擢蘇松兵備副使進參政戊申大水人情洶洶右諫與巡撫周孔教調劑米價不至騰貴後二年又水救濟如前民不爲害其接上端方而御下甚嚴鑑別邪正洞中隱微人不敢欺性强記錢穀細數及人姓名過目不忘在吳中數年未嘗立異爲高而吏畏民懷稱爲神明後至順天府尹王志堅府
徐來建字明卿廣濟人萬歷二十六年以鄉舉任教諭歷蘇州府同知尤加惠吳士攝吳縣篆秋毫無犯俄乞致仕以清約終其身

楊姜天啓間爲府同知清介自守遇事能辦在任八載督治漕艘及軍器有能聲攝許墅鈔關商民便之時織造內監李實驕橫脇制郡縣以屬禮見姜獨不屈撻其怒爲實誣劾巡撫周起元抗疏申救不獲免竟罷官

寇慎字禮亭陝西人萬歷丙辰進士天啓三年來守蘇州操履清潔勤於吏事性慈愛問民疾苦必體卹周至以是深得民心魏忠賢以私怨逮周順昌吳民顏佩韋等擁衆數千人白順昌寃撫臣毛一鷺亦忠賢黨民爭欲擊之一鷺感甚挾慎俱民見皆羅拜號泣呼曰公能活吳民不能活一周吏部耶慎撫慰再三一鷺卒挾以逃民亦竟毆緹騎一鷺心忌之日

夜伺短無所得尋以憂去

陳洪謐字龍甫晉江人崇禎辛未進士授南京戶部主事遷員外郎擢蘇州知府郡多逋賦時考成嚴切方就道已降級及至任咸勸之亟催科笑曰倘有餘力自樂輸將不然徒敲朴無益也吾寧以民命博一官哉由是終任竟無一胥役至民間者時四方多故議兵議餉無虛日東南數郡旱蝗頻仍洪謐處以寧靜蠲一切煩苛吳民安之無異太平日也性慈和生平無怒容豐頤修髯終日含笑坐堂中遇大事毅然能斷十四年歲饑穀湧貴豪家多閉糴羣不逞輩聚黨數百人以告糴爲名直入人家劫倉粟人情洶洶洪謐密捕渠魁三人

杖殺之亂遂息於是開常平倉發積穀身往諸豪家勸令出粟不三日價平乃大興工役修學宮繕城垣濬濠河日役千餘人使少壯者藉以得食其老弱婦女不能力作者設粥食之民賴以生吳江民變撫按勅洪謐行勘單騎往諭皆羅拜伏罪流寇犯安慶督撫檄撤閩門傍城民居萬家爲防禦計洪謐恐擾民白勿撤卽有變願以百口保卒不奉檄嘗閱舊牘見有請以九學書院爲魏忠賢祠者當遣戍罵曰惡有甚於此者乎趣具獄論死奸民張漢儒訐奏常熟錢謙益瞿式耜下三府會鞫同事者難之洪謐正色曰豈有奸民妄上書而守附會以成獄耶卽有罪當獨承之耳比讞上獨署押但

蘇州府志 卷四十四 三
私念曰不當驚吾母乃命其子奉母歸會廷議已白其事竟
報可時稱循良第一然以逋賦削級幾盡每自言吾級不及
一簿尉與松江守方岳貢同以逋賦積歲不遷方十三載洪
九載方清而介洪謚清而和議者兩賢之後卒舉卓異陞
山東副使備兵登萊入爲太僕卿

王尚賢字思聖邵陽人由鄉舉任蘇州同知崇禎六年攝吳縣
事政簡刑清一介不取其持法雖豪貴不撓

倪長圩字伯屏浙江平湖人崇禎丁丑進士授蘇州府推官以
抑豪強鋤奸猾爲務一郡皆憚其威振興士氣修葺學校士
大夫多歸之值四方寇警因立營房於府門左右練鄉勇實

其中時郡守陳洪謚性慈和長圩性嚴毅然遇事輒相商度

無齟齬恩威並濟因立雙清書院

以上俱舊府志

本朝

○丁允元字右海日照人明崇禎四年進士順治二年以前工
科給事中改知蘇州府下車之初庶務草創允元練習典故
因事裁決綱紀秩然時反側未靖城外寇盜充斥 大兵剿
撫在郡者萬計一切軍資器械皆悉心籌畫軍無乏用吳俗
好訟兵革後動以叛逆相訐允元力剪刀風鎮之以靜凡出
納羨耗屬吏餽遺概從屏絕尤加意人材所識拔多知名士
未期月擢廬州副使去

○龔在升字聞園嘉善人順治十六年進士授蘇州府推官嚴飭漕規定耗外禁母苛索漕卒于令者輒縛而懲之遇疑獄片言立折鋤強扶弱豪右不能撓其法以奉裁去

○吳道煌字瑤如宛平人順治六年進士康熙二年知蘇州府郡最煩劇前守治事日不暇給道煌至則飲酒賦詩坐嘯畫諾上官多疑其廢弛及察其政無不治由是服其能性寬厚政尚清靜有投牒者每緩其勾稽或悔而不願終訟輒聽之時民困於賦積逋累數百萬郡符下屬邑率絡繹相望道煌悉停止曰吾寧以一官緩民須臾死卒坐逋賦報罷罷之日吏白積案多未理稍檢視可得貲數千助歸裝道煌欣然令

吏抱牘至悉焚之曰吾不忍留此爲後人虐民地也去後民思之立祠虎邱山麓

○江殷道字九同漢陽人順治十五年進士康熙七年由高州推官陞蘇州督糧同知時漕政多弊旗軍驕橫五米十銀之外索雜費二三倍殷道清節自持多所裁抑上官重其才凡事悉令參決以卓異擢九江知府

○師佐字靖公河南永寧人順治九年進士由福寧州知州遷蘇州督糧同知貧不能就道士民設櫃劇金助之及蒞蘇廉靜自守不擅受一詞董理漕兌釐弊端卻規例每諭糧戶爾等省一釐旁費則完一釐正務民咸感悅三督漕白解餉江

廣疏濬吳淞勘荒履畝皆盡厥職督撫兩疏薦之會病卒郡人痛悼以上俱舊府志

○陳鵬年字北溟號滄洲湘潭人康熙辛未進士四十七年由武英殿纂修出知蘇州府先是鵬年知江寧府以剛正去官聲最著吳民間其來鼓舞相慶至則屏絕苞苴清勤率屬視事未一月決遣滯獄三百餘案於是革除錢糧耗羨嚴濫差戒奢侈禁婦女出游驅流娼懲賭博凡訟師拳勇匪類籍其名朔望令至鄉約所跪而聽講澆風為之一變嘗過婁門外唯亭見水面浮漚中有血痕令人入水得一死屍蓋其妻與姦夫所殺也廉得其事即寘於法洞庭山民以閨房曖昧事

殺二幼子於巡兵家埋其尸沙中吳縣令鞠之求尸不得鵬年突至其處得之其發摘如神多類此吳中連遭水旱鵬年多方賑救公帑不足勸富室出粟又疏濬城河以利貧民大修郡學創興義塾時與諸生講論文藝士庶愛慕四十九年詔兼署江蘇布政使事總督噶禮貪黷樹私忌鵬年清正媒孽其罪嘗密奏其所作虎邱詩以為怨望已遂借承審吳縣令張廷弼虧空遲延劾罷之時鵬年方以公事至鎮江即羈守城隍廟吳人號哭罷市相率赴鎮江問候起居餽遺薪米噶禮持益急擬寘重典會噶禮罷去得解

聖祖知鵬年受誣 召入都仍為武英殿總裁後擢河道總督

卒諡恪勤祀名宦祠

蘇州府志卷第四十四

蘇州府志卷四十五

名宦四

歷代縣令僚屬附

吳縣

漢

陸烈字伯元漢初為吳令遷豫章都尉既卒吳人思之迎其喪

葬於胥屏亭子孫遂為吳縣人

唐書宰相世系表

郎宗字仲綏北海安邱人學京氏易善風角星算六日七分能

望氣候占吉凶安帝徵之對策為諸儒表後拜吳令時卒有

暴風宗占知京師當有大火記識時日果如其言諸公聞而

表上以博士徵之宗耻以占驗見知聞徵書到夜懸印綬於

縣庭遁去

後漢書
郎顛傳

盧志漢時有元賓以孝廉入三署除倉龍司馬衛尉察尤
異遷吳令憲陽春以加惠有鄭僑見思之歌視事二稔民
用康寧辟州從事名拜議郎桓帝延熹二年卒碑在兗州
姓名缺元賓其字也蓋據殘碑載入然既無姓名不便正
列附見
於此

三國吳

呂岱字定公廣陵海陵人爲郡縣吏避亂南渡孫權統事岱詣

幕府出守吳丞權親斷諸縣倉庫及囚繫長丞皆見岱處法

應問甚稱權意召署錄事

吳志

殷禮字德嗣雲陽人弱不好弄潛識過人少爲郡吏年十九守

吳縣丞孫權爲王召除郎中後與張溫俱使蜀諸葛亮甚稱

歎之稍遷至零陵太守卒官

吳志顧
邵傳注

孟宗字恭武江夏人後避孫皓字易名仁初爲鹽池司馬遷吳

令時皆不得將家之官宗每得時物必以寄母常不先食先

是嘉禾六年詔吏在官聞父母喪當須交代故犯者加大辟

宗聞母亡犯禁奔赴已而自拘於武昌以聽刑陸遜陳其素

行以爲之請權乃減宗一等復使爲官

吳錄吳
志合纂

晉

謝詢河東人元康中爲吳令表爲吳二君孫堅孫策置守冢人

孫盛晉
陽秋

江道字道載陳留圉人蘇晉之亂屏居臨海家貧求試守爲太

末令州檄爲治中轉別駕遷吳令中軍將軍殷浩謀北伐請
爲諮議參軍浩甚重之晉書

宋

沈叔任武康人少有幹質爲高祖太尉參軍吳山陰令治皆有

聲官至益州刺史宋書沈演之傳

王遂之字宣約琅邪臨沂人少禮學博聞仕宋位吳令齊南康

相光祿大夫南史

陳珉潁川人爲吳令善發奸伏境內以爲神明時有北地傳僧

祐高平張祐並以吏才見知宋世言長吏者以三人爲首宋書

齊

孔琇之山陰人有吏能補吳令有小兒年十歲偷刈鄰家稻一

束琇之付獄治罪或諫之琇之曰十歲便能爲盜長大何所

不爲縣中皆整肅齊書

周洽汝南人歷句容曲阿上虞吳令廉約無私卒於都水使者

無以殯歛吏人爲買棺器南史

傅翽北地靈州人爲官有能名後爲吳令別建康令孫廉廉因

問曰聞丈人發姦摘伏惠化如神何以至此荅曰無他惟勤

而清清則憲綱自行勤則事無不理憲綱行則吏不能欺事

理則物無凝滯欲不理得乎南史

梁

沈浚字叔源武康人涉學有才幹仕梁歷山陰吳建康三縣並有能名南史

蕭介字茂鏡蘭陵人天監十二年轉主客郎出為吳令甚著聲績湘東王聞介名思共游處表請之普通三年以為諮議參

軍梁書

卞華字昭岳濟陰宛句人晉驃騎將軍壺六世孫梁天監中為安成王功曹參軍兼五經博士聚徒教授博涉有機辯說經析理為當時之冠江左以來鍾律絕學至華乃通焉位尚書

儀曹郎吳令南史

陸蒙仕梁為吳令節操甚高吳郡志

沈炯字初明武康人少有俊才仕梁為尚書左戶侍郎出為吳令侯景之難吳郡太守袁君正入援建業以炯監郡臺城陷景將宋子僊據吳興召炯委以書記之任炯辭以疾子僊怒命斬之以救獲免南史

陳

沈君高字季高吳興人少知名性剛直有吏能大建初東境大水百姓飢弊以君高為貞威將軍吳令尋除太子中庶子陳書

唐

王凝字叔恬絳州龍門人文中子通之弟貞觀四年起家為監察御史使益州時長史高士廉以勲威自重從眾僚候之昇

仙亭疑不為禮訶卻之高甚耻五年高入為吏部尚書會凝赴選竟出為吳令

盧志

盧熊曰按通子福時云疑為監察御史劾奏侯君集有反狀太宗不信黜為吳令大夫杜淹奏疑直言非辜長孫無忌與君集善由是與淹有隙王氏兄弟皆抑不用譜稱疑為太原府君按二說不同盧志並載蓋存疑也

盧東美字善之范陽人大歷十一年為吳令梁肅稱其外寬內

明敬事而信

盧志

宋

邊傲華州鄭人雍熙元年錢氏納土傲首為吳崑山兩縣有賢

行璽書獎勞仕至殿中丞

盧志

羅處約字思純益州華陽人登第為臨渙主簿再遷大理評事

知吳縣時王禹偁知長洲縣日以詩什唱酬蘇杭間多傳誦

後並召赴闕太宗自定題試之以禹偁為右拾遺處約為著

作郎皆直史館

宋史

徐的字公準建安人擢進士第補欽州軍事推官遷大理寺丞

知吳縣移梁山軍

宋史

陳察字晦叔建陽考亭人熙寧中進士歷知石城吳二縣通判

泉州察在吳時蔡京過之為書懸榜察卻之不受以此忤京

京當國召命再至察亟引疾致仕入元祐黨籍年九十五而

終

盧志

張克戩字德祥開封人第進士大觀時知吳縣吳為劇邑民喜

蘇州府志 卷四十五 名宦四 六
爭訟大姓怙勢持官府爲令者踵故抑首務爲不生事幸得
去而已克戩一切裁以法姦猾屏氣使者以狀聞召拜衛尉

丞 宋史忠義傳

趙訓之字晦道秦悼王五世孫政和二年進士調東平儀曹知
吳縣朱勔怙勢役州縣訓之不爲屈勔嘗執數輩詣縣請治
訓之悉縱之忤勔遂移疾去 宋史忠義傳

趙彥真字德全宗室子寓會稽舉進士以宣教郎知吳縣時永
思陵攢宮事興轉運司調取洞庭青石期會迫促彥真卽日
涉湖至其地名工泣諭之於是民趨役不待督責先期告畢
使者欲上其勞彥真力辭曰此臣子職也秩滿通判袁州 盧志

葉延年字公是處州人嘉泰中知吳縣有豪民張姓族數十人
皆以虎自名居光福山澤閒負固阻險聚仇黨四出侵暴凡
三十餘年延年擒寘於法邑人德之立祠於瑞光寺 盧志

唐璘字伯玉古田人嘉定十年舉進士調吳縣尉有殺人於貨
挾其舟亡者有司求賊急屠者自告吾兒實殺之兒亦自誣
伏璘問舟何在錢何用其辭差互璘疑爲緩之果得賊太湖
與舟俱至舉縣感服縣有勢家治圃將鑿渠通舟繆言古有
渠常平使者王之璘視乾道故籍則民田也力爭忤使者意
移監縣稅璘遂以直聞調端州學教授 宋史

孫子秀紹定五年進士調吳縣主簿有治妖人水仙太保事詳

見前諸使內

黃震字東發慈谿人寶祐四年進士第調吳縣尉吳多豪勢家
告私債則以屬尉民多飢凍窘苦死尉卒手震至不受責家
告申白提刑孫子秀移文一路禁戢其患民有小爭有司俾
尉羅弓矢以捕怨家移牒必曰躬親而吏卒漁獵以困民震
又請於知府洪燾自是訟牒無躬親之文縣界有焚人亭爲
風雷所壞浮屠規欲復創震白之府謂焚屍者夷狄之法史
傳所書仇怨刑戮之酷罪盈惡極乃有焚滅其尸者亦春秋
戰國以來之事古無有也然殺者常刑焚者非法非法之虐
且不可施於誅死之罪人况父母骨肉乎傷風敗俗莫此爲

甚其亭勿令再置判府程元鳳黷之事竟止府檄攝其縣事
及攝長洲華亭皆有聲浙東提舉常平王華甫辟主管帳司
文字時錢庚孫守常朱熠守平江吳君擢守嘉興皆倚嬖倖
厲民華甫病革強起劾罷三人震贊之也

宋史盧志合纂

元

張經字德常金壇人博學通才初任吳縣丞三年以政最陞知
縣事仁恕公廉時擾攘之餘繼以凶疫民死者半經焦勞全
活百姓感懷擢嘉定州同知

姑蘇志

明

曾黼題名誤作觀 蘄州人洪武五年知吳縣以公勤稱縣左右安仁

美政東興西成四坊皆黼建也

姑蘇志

鄭珥福清人第進士拜監察御史洪武二十一年改知吳縣廉

勤能幹吏民畏服

姑蘇志

吳永達臨川人由嚴州照磨擢知吳縣勤慎著聲

姑蘇志

吳復閩縣人由吏員任吳縣主簿宣德九年知府况鍾知其能

奏陞知縣滿三載改知栢鄉陞工部主事侍郎周忱來巡撫

辟為屬官歷陞本部侍郎尚書

楊循吉吳邑志

葉錫字元圭永嘉人宣德五年進士選庶吉士正統元年知吳

江縣以廉謹聞未幾聞母喪去四年復除吳縣政事尤偉十

年舉卓異奸民訐於朝將逮繫吳人羣詣闕頌錫乃令視事

如故抵誣者罪十三年擢寧國知府

明史參縣志載侍講徐理之論曰元

圭為治一本經術先律已而後齊人惟理之從法之守他無恤也官長承迎之私不行僚吏比周之情不接豪猾敢攘之姦不得行故雖深得細民之心而忌者亦眾或軋之於上怵之於下咻之於旁元圭堅不動至是而循良之效白焉時以為知言

聞人讎餘姚人天順二年由御史調知吳縣政尚剛果號令風

行姦戢民安卒於官

楊循吉志

雍泰字世隆咸寧人成化五年進士除吳縣知縣太湖漲沒田

千頃泰作隄為民利稱雍公隄民妾亡去妾父訟其夫密殺

女匿屍湖石下泰詰曰彼密殺汝女汝何以知匿所且此非

兩月尸必汝殺他人女冀得賂耳一考而服名為御史累擢

南京戶部尚書

明史

文貴字天爵遼東廣寧左屯衛人進士成化十一年知吳縣施

政儒雅逃亡盡復賦役平均儲糧六萬石值歲荒賴以賑給

費舍一新十七年擢御史

楊循吉志

陳振字時起鄞人成化十八年以進士知吳縣持廉鎮靜政清

訟理弘治改元召拜御史歷山東右布政使

王志堅府志橐

鄭軾字式之江西永豐人弘治元年以進士知吳縣泣政以勤

一歲言民事章十三上又兼攝嘉定縣民服其明斷擢御史

終四川副使

楊循吉志

鄺璠字廷瑞任邗人進士弘治七年知吳縣聰察勤政無績不

興久任民和循良稱最十二年陞徽州府同知官至瑞州知

府

楊循吉志

孫磐字伯堅定遼中衛人弘治十五年以進士知吳縣秉性亢

直以約得民奏最陞戶部主事

楊循吉志

劉恒字以貞吉水人進士正德元年知吳縣甫至增廣學舍二

十餘楹以便士子居業于縣治建庫庋版籍中作堂顏曰不

易他如泰伯伍胥祠范文正墳廟皆整飭以潔祀事審編徭

役差富郵貧時逆瑾用事多額外徵恒善調劑民不為困四

載擢工部主事

牛若麟吳縣志

董仁正德四年任主簿居官廉平滿三載陞鄞縣丞攀轅者千

計王鏊賦詩美之

牛若麟志

李禎正德五年任舟頭巡檢時水荒民飢有司奉朝命勘災賑粟多緣為奸利獨禎領檄散財專及鰥寡民受實惠任滿眾

圖像尸祝之

牛若麟志

胡文靜山陰人進士正德六年知吳縣疏通勤敏達於政體尊

賢容眾八年拜御史官至光祿少卿

楊循吉志

楊叔器侯官人進士嘉靖二年知吳縣勤恪有為宿弊盡革四

年召拜御史

楊循吉志

蘇祐字允吉濮州人嘉靖五年以進士知吳縣涖政三月洞悉

民隱戢暴懲奸風行電擊會計錢穀胥吏莫敢隱蔽毫末百

廢具舉脩繕治署學宮務俾永久縣向無志祐禮聘南峰楊

循吉創纂選御史官至兵部尚書

文徵明贈序

朱廷臣字敬之海陽人嘉靖十二年以進士知吳縣公清耿介

才復雄敏秩滿拜刑科給事中

牛若麟志

宋儀望嘉靖二十六年授吳縣知縣萬歷初巡撫應天事詳前

諸使內

安謙字子光成安人進士嘉靖三十五年知吳縣當倭難後繕

城垣修橋路建楓橋木瀆兩敵樓據險增勝功實不磨祇以

簡傲不能其官

錢允治筆識

曹自守字伯化荏平人進士嘉靖三十八年知吳縣時值兵荒

復大水自守誓殫心力知吳中吏善舞文首先裁抑不悛者
 置之法聽訟多勸諭而未嘗窮竟有大犯雖權貴不少假拊
 卹飢殍散糜施藥身自儉約三年不製一衣不宴一客衙署
 惟蒼頭一人門不扃筭不鑰廉聲大著自守素知醫客有慮
 及其家事者自守笑曰吾他日居鄉賣藥足自給何復他求
 宋居四年以憂去百姓號呼載道有直抵其家者後吳民往來
 都下過荏平遇醫以驢負藥籠而行視之則自守也民驚拜
 道左自守復以藥金施之而去服闋拜吏部主事歷員外郎

擢江西提學副使

陳鏊記

魏體明字用晦侯官人進士嘉靖四十四年知吳縣精明強毅

在吳四載豪右屏跡熒困獲避擢刑科給事中歷官四川布

政使

牛若麟志

傅光宅字伯俊聊城人進士萬歷八年以靈寶知縣改知吳縣

慷慨識大體精心吏事案無留牘時有丈量之令問右里胥

互為姦詭光宅摘發如神喜接文士暇輒延之談讌善榜書

祠廟剝院廳署多為題額在任六載召拜御史遷四川提學

副使

牛若麟志

江桂馥字爾馨泰寧人萬歷二十年以吏員任吳縣丞不攜家

累性剛守潔聽訟執法雖強禦莫能挽人呼江鐵頭遷太倉

州判官再擢高郵州同知

牛若麟志

袁宏道字中郎公安人萬歷二十年進士選吳縣知縣聽斷敏
決公庭鮮事與士大夫談說詩文以風雅自命已而解官去
起授順天教授以清望累遷稽勲郎中

明史文苑傳

陳以聞字無異麻城人萬歷三十六年以進士知吳縣尊賢禮
士嚴絕匪類有治辦聲居二載調無錫縣官至刑部侍郎

牛若

麟志

陳文瑞字應萃同安人天啓五年進士知吳縣按獄持法推情
豪貴莫敢撓事上不諂過客騷擾必抑之浚縣治前學宮內
外各河盡清所占在任五載喜親賢士大夫初為諸生時受
知於周順昌當順昌被逮矢心以報不避艱危及吳民憤擊

緹騎幾成大變文瑞苦心調解郡人默受其惠忌者中以計

典遂歸不出

牛若麟志

牛若麟字玉書黃岡人天啓進士崇禎十年知吳縣時連歲旱

蝗民困飢疫死尸枕藉奸民乘機劫奪若麟請之上官發廩

煮糜又市藥延醫以療病者兇徒悉按以法境內始寧又延

舉人楊廷樞諸生王煥如等輯成縣志十五年以艱去

舊府縣志

合纂

本朝

○劉滋字霖蒼任縣人順治十八年進士康熙二十二年知吳
縣案牘悉親裁決不假手於人馭下嚴胥役不得售其奸勢

要以私干請者持法愈堅催科每改限以寬民力輸納者輻
湊先是收銀率委佐貳及書役因有侵盜乾沒滋親收兌積
弊一清吳當要衝師旅往來旁午滋殫力經營速致出境民
以不擾有以土田塚墓告許者必親至其地勘之曲直立判
修葺縣學勤課諸生家屬皆布衣蔬食共甘澹泊二十四年
擢刑部主事

○張隆字湛謀濱州人康熙十五年進士二十七年知吳縣涖
事明敏案無留牘值歲歉民多逋賦隆設法催科如期輸納
俗素刁訟一以靜鎮處之不輕准不濫差訟爲之簡朔望宣
布

長洲縣

唐

岑仲翔江陵人宰相文本孫也爲長洲令時兄羲爲金壇令弟
仲休爲溧水令皆有治績宰相宗楚客語本道巡察御史曰
毋遺江東三岑唐書

談戴曲阿人長洲尉有詩名與包融等十八人爲詩殷璠會次
爲丹陽集盧志

滕遂貞元二十一年舉明經及第又書判登科歷大理評事長
洲令攝吳縣時人歌曰朝判長洲暮判吳道不拾遺人不孤
人謂有漢叔輔之遺風改侍御史供奉賜緋盧志引
滕氏譜

宋

王禹偁字元之鉅野人太平興國八年擢進士授成武主簿徙

知長洲縣就改大理評事同年生羅處約時宰吳縣日相與

賦詠人多傳誦太宗召試擢右拾遺直史館賜緋故事給銀

帶時命以文犀帶寵之

宋史 盧志載禹偁自敘曰禹偁名利之流也一身之計有親族妻子焉

雖內無妾外無僕不可去者凡百指晨有炊爨夕有脂燭伏臘慶弔居其外月得俸金大半長物是以從官徒行而已一邑之政有租備稅調焉土甚瘠而民不懈吏好欺而賦愈重廉其身而濁者忌之直其氣而曲者惡之懇無知音動有變畏去年多稼不登編戶艱食賦歛之數有乖其期而民部督成于郡郡侯歸罪于縣鞭笞之人日不下百數葦菜色在面血流于膚讀書為儒胡寧忍此因出吏部考課歷納質于巨商得錢一萬七千市白粲而代輸之始可免責春夏以來民有歸其直者蓋三分有其二焉

上諭寒暑弗輟葺學宮新縣治政多修舉

以上舊縣志

○冉琪字東美貴筑人康熙己卯舉人雍正三年知吳縣知吳

中吏役素橫痛抑之其中黠者相煽惑闕堂求去琪不為動

凡涉命案者無問真假其費不貲琪祇一吏一役一僕自隨

得報即往驗不留俄頃曰稍遲彼得借以求賄矣卒為吏所

中而去琪素謹飭無虧空吏私蝕之而強坐琪不能償遂困

吳地以卒

新縣志

大夫賦詩榮之

高飭字去華丹陽人資政殿學士安朝公九之子天聖間知長

洲縣凡四為邑所至吏畏民愛歷知宣歙明三州

禹偁字元之鉅野人太平興國八年擢進士

吳越以卒

志

太宗台試擢右拾遺直史館賜緋故事給銀

中而去其素韜澹無繡空爽味贈之而臥坐其不詣賞致困
昏辨唱卦劍不留劍更曰師數必昏昔以來韻矣卒為吏視
其世命染香無問其費不賞其派一吏一野一對自韻
中吏必素黃齷咻之其中譙者林融烈開堂宋去其不飲

○冉其字東美貴族人舉進士累遷監察御史坐不時具獄

上備寒暑兼連草學官祿課命如多

舉

章頻字簡之建州浦城人舉進士累遷監察御史坐不時具獄

降監慶州酒徒知長洲縣天禧初以選名對稱旨擢監察御

史遷侍御史歷刑部郎中使契丹卒累贈司徒

盧志

王嘉言字仲謨禹偁子天禧初知舒城縣丁母憂服除會真宗

觀書龍圖閣得禹偁奏章嗟美切直因訪其後宰相稱薦嘉

言即名對擢大理評事知長洲縣縣既禹偁舊治而嘉言年

與官又皆同士大夫賦詩榮之

邵飭字去華丹陽人資政殿學士安簡公亢之子天聖間知長

洲縣凡四為邑所至吏畏民愛歷知宣蘇明三州

劉立言字禹昌臨江人以殿中丞知長洲縣縣多過客或求發

民以輓船立言一人不與郡官爲移書亦不聽所至興利除惡去後人輒思之

夏噩字公酉池州人嘉祐二年中材識兼茂科試光祿寺丞知長洲縣噩性急遇事輒發出語無隱情人多憚之提刑陳道古惡其輕傲摺以私貸民錢按罪勒停由是坐廢十年後文彥博爲白於朝詔還其官

王幾字彥成江都人知舒城未赴丁父憂王安石知其才選知長洲縣長洲故號難治令剛則踰弱則廢幾平其政弛張以時卒能懾服豪強貧細得職歲饑賑救有方人用安堵權勢欲侵撓之輒拒不受治聲聞京師

翟濤丹陽人通三傳專於禮樂一時碩儒好禮者推之知長洲

縣後以孫汝文貴顯贈太子太傅

以上俱盧志

常安民字希古邗州人熙寧六年登進士選成都府教授秩滿知長洲縣以至信爲治人不忍欺縣故多盜安民籍嘗有犯者書其衣揭其門約能得他盜乃除盜爲之息追科不下吏使民自輸先他邑以辨轉運使許懋孫昌齡入境邑民頌其政皆稱爲古良吏元祐初李常孫覺范百祿蘇軾鮮于侁連

章論薦擢大理鴻臚丞

宋史 盧熊引續志云安民自元豐六年知長洲縣邑權豪肆橫訟牒日

數千安民先正紀綱圖籍以立政本省文移追呼以清訟源始至求亂政者得何平丁文通朱鈞花三人杖而屏之終政不敢至訟庭鄉胥掌田里租庸之籍移輕易重爲姦弊莫能制募吏法當試因令根摘版籍之欺隱代之獲冒請青苗者

蘇州府志 卷四十五 名宦四
荷繫于庭使指識冒名人以贖罪其約而有法皆此類也信
既立人不忍欺催科不事鞭朴豫爲信限揭實數于縣門使
自輸輒先他邑辦負坊場責者戶率十數人督之坐食其家
安民悉縱之使歸葺坊事與約分所負爲三年自輸之安民
爲親受部使者聞之愕曰常平法敢爾緩邪安民曰異時以
昔較今儻增溢不敢自以爲能庶幾邑人獲一飽已而償數
果倍又歲旱農盜決運渠以溉田法當徒犯者且衆安民白
郡守曰水所溉穀成當得賦入數十萬今未至盪舟而寘人
于法坐失數十萬之入以此較彼孰利孰害請釋勿治是歲
吳大旱惟長洲中熟及安民去官犯者論如法皆號呼田閒
曰安得常公活我于將
斃乎自著長洲政事錄

虞賓字舜臣山陰人以宣德郎知長洲縣縣多富室大姓數負
強亂法黠吏橫索亡度率並公侵漁細民二千石無敢成其
罪賓張設耳目盡得姦利鉏治之一縣屏息歲大饑民無蓋
藏部使者猶急宿負檄下曰必辦賓閣束文書不問使者怒

賓進說云云使者愕立謝會邑民遮道願留虞君三年卽表

民言薦之崇寧初累遷比部員外郎

盧志

陸寀字元珍政和中知長洲縣縣號繁劇且久不治寀至從容

如無事而縣以大治以最遷郎就命通判真州

尹機紹興中由趙鼎門客以恩補官知長洲縣秦檜當國以賊

追勒檜死復元官

祝拱卿字德良建安人慷慨有志節出入張循王幕下紹興中

知長洲縣卒官

王彥融字炎弼江州人祖韶樞密副使彥融紹興中知長洲縣
權崇德德清皆有政可稱

陳資深常州人爲長洲簿洪邁爲禮部侍郎薦其性資開明問學純粹持身廉潔諸司委之他郡惟以便民爲務不爲利誘不爲威脇使膺百里之寄必有卓然可觀者

以上俱盧志

宋楚材睢山人景定三年以經明行修知長洲縣嘗領學事始創建學宮士尸祝之祀於學

縣志

陳應角字軒伯連江人咸淳三年知丹陽縣清強剛介治聲翕然竄豪民辨誣枉行鄉飲旌孝義泊去官邑民生爲立祠歷長洲改提刑司主管文字

龔灤字深父高郵人居鎮江歷知長洲縣官至司農卿國亡士大夫居班行者隨例北上灤行至莘縣不食卒

以上俱盧志

元

于文傳長洲縣尹事蹟詳見人物

元童河隴人後至元元年爲長洲達魯花赤縣歲輸秋糧三十六萬石夏稅絲八萬二千兩童以民困已極親至野次相田高下定腴瘠教民謹浚塞厚墾植其濱江湖者更科以蕩課民力始蘇先是至治初行津助役法民田畝十抽一以助役二十餘年田屢易主而役法仍舊甚爲民病童考定有無均征之又於舊治創建縣學募民捐田以養士遂昌鄭元祐爲作遺愛碑紀其事

盧志

明

宋文敏洪武元年知長洲縣有功於民祀名宦

張翔洪武六年繼宋文敏為長洲知縣多惠政

以上俱縣志

李廣佑建寧人洪武二十七年以進士知長洲縣廉能有惠政

卒於官

周伯陵武義人洪武三十年以人才辟知長洲縣政尚寬平獄

訟清簡後調江西布政司副理問永樂五年復任本縣卒於

官

以上俱姑蘇志

黃子威名輅以字行進賢人由儒士洪武中薦署屯田司主事

三十三年謫長洲丞涖事勤敏刑罰清簡民甚安之考滿遷

刑部員外郎永樂初擢松江知府

王志堅府志彙

王敬襄陽人知長洲孝悌廉謹著稱于時永樂二年應求賢舉

陞知泗州

劉幹字孟楨修武人先授岷府紀善永樂初浙西大水幹從尚

書夏原吉來治改長洲丞兼理農事以母喪去民遮留悃切

事聞詔服闋再任幹宅心仁厚性操廉白每出勸農周行賸

隴呼老農問所病苦慈孺之色溢于眉面所至民驩迎曰父

母來矣歲饑民輸後期上官譴責幹以身當之曰此丞之怠

職也請代其罰人有過當笞惟喻以理終不下鞭箠無不心

服所居不障風雨敝衣惡食處之泰然洪熙元年卒於官無

以為殮邑民嚴思敬等殯之頓於郭西僧舍及將歸葬士庶

陳奠道旁悲悼若喪所生士人郭儀因人心眷慕之深留其衣冠於半塘側聚土葬之名曰劉公墩詳見郡人樓文淵所

撰墩記以上俱姑蘇志

邵昕字宏啓餘姚人永樂中以薦辟授長洲縣丞長洲賦重前此官丞者悉坐催科之累或至厲民以求稱職昕獨以德化名諸大姓開諭利害鞭笞不施而歲額如期辦集九載秩滿巡撫周忱知府朱勝上章交薦擢崑山知縣俄以父喪去逾小祥會崑山逋賦幾盈百萬兩公又交奏起昕乘傳復任歲餘逋賦通完昕赴吏部改除贛縣又以母喪免復除休寧縣自陳老疾致仕王志堅府志彙

余金字貢之內江人成化初以進士知長洲縣羣吏作姦金以理教誠不率者稍加懲艾皆為改行民多許金不設鈎距一以公義裁決許者謂不可欺稍引去其終訟者轉詣上司上司曰汝有賢令毋庸至我其人亦解散徭役丁夫每患為下人顛倒金署手籍默視始得其平豪夫富子不少假借謝絕請託安守儉節防戒家人甚嚴不得輒至中門嘗見几有紙畫數幅乃其子購之他地者悉取焚之十年召為監察御史

姑蘇志

劉輝字雲翰孝感人成化十四年以鄉舉知長洲縣平易近民每斷獄必曲求生全不為鍛鍊而其情偽卒無所隱有周復

盛者被誣劫掠連逮多人輝皆白其冤值大荒章練塘之民以餓索食吏索賂舞文論死輝請於部使者減從竊盜律陳湖有顧姓泛舟江淮誘商賈僦舟劫其貲輝盡擒而戮之歲賦征輸不前輝兼準他邑以寬其逋又發粟作粥飼飢中官王臣肆虐輝首挫其鋒一貧民不能娶詣縣求解婚約輝助金成禮後生子名之曰劉在任十年致仕去

王志堅府志彙

劉珂字公佩興國州人弘治十一年以進士知長洲興學校禁賭博墾民田三千餘畝興水利七百十處置義冢三毀淫祠十復張阿保等三百餘戶工部以濬河奏徵郡屬雇役錢珂力言於上官請免歲省費十餘萬吳人大悅辛酉遷太僕寺

丞

王志堅府志彙

李珏開州人進士正德元年知長洲縣強毅明辨知民所疾苦豪右匿籍規避庸調者悉覈出之人吏畏懾四年陞主事去俞集新昌人正德八年以進士知長洲縣躬甘蔬糲以矯侈俗貴要往來未嘗為設具所司供餽皆節縮一錢不妄費人知其操執不較也其他賑貸平反惠愛尤多十一年召為御史高第字公次綿州人進士正德十一年知長洲縣以文學飾吏治郡士多被禮接陞刑部主事歷吏部郎雲南副使郭波閩縣人進士正德十六年知長洲縣性敢摯無所避購告言民間事瑣屑必知豪宗皆手籍之入者未敢縱舍遷工部

主事以抗織造中官張志聰誣奏下詔獄調按察照磨以上俱長洲舊志

俞憲甫定海人正德戊辰以貢入太學授長洲縣丞督漕稅催

征有敘雖頑民皆知畏而樂輸委訊訟牘能以理開諭兩造

輒自獻其誠不敢終訟值歲饑民將逃徙委曲撫綏緩征急

散民忘困而感德嘉靖改元屢以疾告致仕王志堅府志彙

馬思誠宜陽人正德末以貢授長洲縣丞淳謹朴茂歷二考其

貧猶韋布雖資釜充物不一動心嘗署崑山縣持已公而繩

下嚴雖時用刑振弊然皆心服無後言巡撫李充嗣嘗委以

勘災思誠簡覈甚精里胥無敢因緣為姦既而奉旨蠲賑民

皆德之王志堅府志彙

賀府字中甫渭南人嘉靖十二年以進士知長洲縣貞介醇亮

不事威嚴而人警服知府王儀清理田賦府悉心佐之搜剔

隱蠹宿弊盡除邑有東區者本明初沒官田額既重且多濱

江苦潦與他鄉同重役民間指為子孫無窮之害府憫之請

於撫按免其重役又區處圖頭及寬立限法民皆便之久而

益懷其德十四年以艱去後陞兵部主事嘗欲陳三事其一

寬吳積逋會以黃籍楊潛碑參舊志

吳世良字元良遂安人嘉靖戊戌進士十八年知長洲縣性通

朗不拘禮下賢儁先時編役多出胥吏所報皆殉利不公世

良於朔望大集時忽闔門授片楮命各手實厥人頃刻而具
亟填申報奸罔措手富戶田多飛灑糧役不充世良驗前冊
得昔有今無者果庇於勢家卽注上差役既均而糧亦清完
遷建新學皆出其規畫士之貧者每厚周之二十一年調簡

去

王志堅
府志彙

周良臣字相季公安人嘉靖乙丑進士四十五年知長洲邑政
紛雜釐易有條一切裁以法諸豪猾素侵蝕悉核令自實以
償夙弊頓清冊籍環案王者盈庭一一勾校無敢搖其手夜
分猶聽覽諸泛役浮費減節殆盡津路一無餽遺人亦憚不
敢索以憂去

陳用賓字道亨晉江人隆慶五年進士除長洲知縣案無留牘
力刷宿弊始縣秋糧折色民多積欠部檄旁午長吏多負譴
用賓徵比有法稅糧完至八分萬歷三年擢御史

李堯民字汝化濟寧州人萬歷三年以進士知長洲縣初尚威
嚴後稍和恕徵糧有法裁決如流五年外艱去後以御史按
吳搜姦剔蠹加禮耆碩歷官應天府尹

劉懷恕字士行東明人萬歷五年進士六年知長洲縣是歲卽
遭螟螣明年大水又明年復水繼又水騰並作時誅求之令
甚於東濕懷恕先穰區次殷戶立限取盈其水鄉單民姑緩
之以故額不甚虧邑多汙萊前政雖嘗議補經制未一至是

丈田得羨餘糧議以裒各良田畝三合懷恕曰此於良田不足為恩曷若通入汗萊之為便乎議上得允遂為定制懷恕繼李堯民為政因其嚴肅縣之錢糧積弊歷李至懷恕釐革殆盡十一年召為御史以上俱舊志

陳其志字公衡晉江人萬歷十一年進士初除永嘉知縣丁外艱十八年自奉化移知長洲吳士之以文見者無不延接評騰藝文各當其人至其利鈍淹速之故能一一懸斷數年之後皆如其言簿書期會又未嘗不治辦也秩滿授南戶部郎歷兵吏禮三部嘗分校南闈得士十人其九成進士王志堅府志彙江盈科字進之桃源人萬歷二十年以進士知長洲縣持身廉

慎推心不疑撫字征科並行不悖居常戴星出入不辭勞瘁

酬應事亦隨理民甚安之越兩考陞吏部主事歷四川提學

僉事王志堅府志彙

鄧雲霄字元度東莞人萬歷二十六年以進士知長洲縣賦性明察事至立照而行法嚴毅毫無假借點審差役釐然允當修塘築圩履畝不辭僻遠吳中詞訟多無情而人命尤甚雲霄創一詞式凡毆期死期毆所死所造意下手何人兇器何物一一列明凡捏空者不能措手而初詞既定後雖反覆百出莫可游移凡事多畫一可垂永久三十二年擢南戶科給

事中歷官廣西參議王志堅府志彙

祁承燦字爾光山陰人萬歷三十二年進士初除寧國縣以才調繁長洲歲大荒承燦議賑議蠲苦心調劑民免於災又憫邑田半入官戶細民所餘無幾條議更張不果行而去民思之

韓原善字繼之盧龍人萬歷丁未進士三十八年以青浦令調繁長洲持躬莊慎盛暑退食必衣冠以處文牒必手自裁決聽斷執法不撓而能待士民以和初役法繁苛率詭寄花分役貧而漏富原善力請均役積弊以清擢戶部主事終開元兵備

胡士容字仁常湖廣廣濟人萬歷庚戌進士四十一年以嘉定

知縣調繁長洲士容天資剛正有經濟才時吳下惡少年有結盟稱天罡者甫下車密廉其人悉置以法築至和石塘達崑山界五十里陸道始通至今稱胡公塘

葉成章字慕同福建同安人萬歷四十七年以進士除長洲知縣甫至漫不省事人呼爲葉木頭旣而判決如流錢穀利弊洞若觀火取其奸之尤者重創之羣吏屏息錢糧徵比恒至達旦不輕差一人亦不輕議一重辟獄訟清簡天啓五年擢御史

李實字如石四川遂寧人崇禎末以進士知長洲縣當兵荒後民不聊生實性仁恕每遇徵比爲泣下恒以至誠勸諭不加

敲朴而國課無缺所立挨差法棋盤比冊編審冊奸胥豪戶不能上下其手嘗攝吳縣篆巡撫檄改鶴山書院為射圃實言此時習射已無及而徒廢先賢祠遂止妄男子疏言洞庭西山產煤宜開廠太湖漁舟宜徵稅歲可得十萬因遣中官來勘實謂曰西山金陵後脉恐傷祖陵不可開太湖盜藪若征漁稅是激之變也中官懼其事得寢國亡後棄官隱葑門外上清港垂三十年卒

以上俱本舊府縣志

本朝

○沈恩舉字謙能汀州人順治丁酉舉人康熙十年除長洲知縣屬吳中大水漂沒田廬恩舉加意撫綏催徵不事鞭朴課亦及額縣役素橫乃立需索單於里甲每月填報有無輿皂皆斂跡是歲復旱蝗恩舉齋戒步禱蝗不害稼雨亦隨降以鄰邑失盜坐累去百姓攀轅泣送祀之前令葉成章祠題為

雙清書院

舊府志

○李敬修字念茲奉天人康熙十三年由兵部筆帖式授長洲知縣邑中田賦明季以來多隱蔽混淆會巡撫奏請清釐敬修以此事非親履田間弊終難除遂請解任專督丈量循行四鄉無間寒暑因荒熟以更定斗則豁除坍沒公占所造魚鱗冊犁然可考官民始免賠累自十五年八月至十七年六月事竣乃還任尋以不催旗員耿繼訓歸旗降調去

崑山縣
 三國吳
 顧雍字元歎吳人爲婁長有治績詳見人物
 宋
 祖冲之字文遠范陽薊人少稽古有機思宋孝武時解褐南徐
 州從事公府參軍出爲婁縣令謁者僕射
 梁
 何元之廬江灄人好學有才思梁天監末袁昂表薦因得名見
 累遷信義令宗人敬容位望隆重頗相顧訪元之終不造焉

崑山縣

三國吳

顧雍字元歎吳人爲婁長有治績詳見人物

宋

祖冲之字文遠范陽薊人少稽古有機思宋孝武時解褐南徐

州從事公府參軍出爲婁縣令謁者僕射

梁

何元之廬江灄人好學有才思梁天監末袁昂表薦因得名見

累遷信義令宗人敬容位望隆重頗相顧訪元之終不造焉

南史

陸慶吳郡人仕梁為婁令詳見人物

陳

殷不佞字季卿長平人少立名節居父喪以至孝稱好讀書尤

長吏術梁承聖初遷武康令高祖受禪除婁令

陳書

唐

萬齊融越州人為崑山令神龍中與于休烈賀知章賀朝包融

為文詞之友齊名一時

盧志

劉綺莊為崑山尉研窮古今博考傳記作類書一百卷號崑山

編至今傳於世

吳郡志 姑蘇志云綺莊毘陵人舊府志前有萬希序題云開元二十九年

王綱大歷九年以大理司直為崑山令政務化民始作學舍置

博士弟子員民興於學有不被儒服而行者莫不耻焉

盧志

權立文公德輿從兄也敏於學行薄於宦情為崑山簿德輿作

序送之

姑蘇志

宋

邊倣雍熙初為崑山令見前吳縣

趙積字表微宣城人為入誠質寬厚擢進士第由大理寺丞知

崑山縣

宋史

梁適字仲賢東平人翰林學士顥子少孤嘗輯其父遺文及所

自製以進真宗曰梁顥有子矣授秘書省正字知崑山縣徙

知梧州

宋史

張方平字安道南京人景祐中知崑山時吳越歸國未久郡邑地曠民占田無紀歲遠多侵越訟數十年不決方平召問所輸租稅大約百一二乃收其餘以賦貧民自是無訟時侍郎蔣堂為郡守得方平所著芻蕘論上之因舉為賢良

中吳紀聞

邱與權建州人至和中為崑山主簿時議修崑山塘與權陳五利且言事或不成請以身塞責郡列其議以聞塘成至今為利後趙抃薦其嘗為蘇州教授學者如歸固窮守道未始隕獲王珪亦薦之曰藝文優贍議論純正遭時右文宜見收采

盧志

韓正彥字思德魏公琦猶子嘉祐中知崑山縣號為難理正彥

能以靜勝囹圄為空創石隄疏斗門作塘長七十里人不病涉得膏腴田百萬頃部使者以最上又請以輸州之賦十三萬從近便輸於縣以所造塘餘材為倉廩以貯之民大悅比去遮道以留生為立祠作思韓記鑿諸石

中吳紀聞

陳郭字彥聖第進士知崑山縣歲饑屬邑希部使者意不敢請蠲郭曰歲歉而不蠲賦民必流轉溝壑請之甚力竟蠲之

縣志

梁澤民南劍州將樂人政和中為崑山令有惠愛其父伯臣來就養陰相之力為多

盧志

程沂字詠之洛人伊川先生從子紹興間知崑山縣為政中和

有古循吏風

中吳紀聞

王綸字德言建康人十歲能屬文登紹興五年進士第授崑山主簿二十四年以中丞魏師遜薦為御史論事忤秦檜罷去檜死召為起居舍人歷工部侍郎同知樞密院事卒諡章敏

盧志

汪大猷字仲嘉慶元府鄞縣人紹興十五年進士知崑山縣丁

父憂宋史

謝深甫字子肅臨海人乾道二年進士由嵎縣尉調崑山丞為

浙漕考官一時士望皆在選中司業鄭伯熊曰文士世不乏

求巨眼如深甫者實鮮宋史

葉子強縉雲人學問該博工詩文淳熙二年知崑山政尚簡易

在任三年百度修舉以邑有潮至唯亭之識遂建問潮館於

駟馬橋西後潮過唯亭衛涇遂魁天下以先任無所考稽遍

稽史牒取雍熙以後五十六人刻諸石留意學校增修黌舍

入官奉常擢朝奉郎縣志

潘友文字文叔東陽人朱仲晦呂伯恭皆與友善開禧初知崑

山寬厚愛人人呼為潘佛子秩滿爭結綵樓于路號曰去思

盧志

王萬樞字贊元金壇人為崑山尉得海盜溢格吏請出郊以應

親獲之文萬樞據實卻之終知吉州

陳璧字君玉為崑山主簿勸勉士子不憚其勞邑士造問無虛

日所成就極多

葛洪字容父東陽人從呂祖謙學登淳熙進士第為崑山尉理宗朝參知政事杜範稱其侃侃守正有大臣風卒諡端獻

潘彙征字泰初建康溧陽人記問該洽宗伊洛之學嘉定中第進士劉宰嘉其志不苟求學行兼備薦之於朝知崑山縣以政治聞人服其廉平再調繁昌卒

項公澤字德潤永嘉人淳祐間由長洲丞辟宰崑山前政自李枕滿秩後更十三任不以善去公澤以文學飾吏事留意學校買田養士為政廉敏百廢具舉官至中奉大夫

徐閻詩字子言嘉興人性穎悟八歲通九經理宗時由童科擢

第淳祐中知崑山官至知惠州

吳堅字彥愷天台人淳祐中為崑山主簿以厚風俗正人倫明

義利闢姦邪為先務德祐末拜左丞相以上俱盧志

林桂發咸淳間知崑山政務愛民心存教士增建學宮諸生感

悅祀之賢守令祠縣志

元

潘昂霄號蒼崖濟南人至元十九年知崑山以文學飾吏治所建立悉中肯綮有古循良風縣志

王安貞字吉卿安陽人補浙西帥府掾至元二十九年授浙省理問知事累遷崑山知州時州初遷公字百無一二安貞規

畫創建費鉅而民不擾政教懋舉秩滿授饒州路治中

姑蘇志

那懷本蒙古僉吉刺氏泰定初以武德將軍為崑山州達魯花

赤時州治新遷公廨未建懷募里正與役有方民皆樂從先

是上官涖州供帳器用悉貸於富室懷以公罰錢置造百用

具備應役者始息肩

縣志

姜復昌嘉興人任崑山州判廉而有才時津助法行與省官覈

產程役審諦平允寬免單窶容氣溫舒而遇事執直雖長官

獷悍詞色為屈秩滿將去民爭預餞之復昌抵夜潛往咸嗟

悵而退

姑蘇志

八資刺字思齊畏吾氏後至元丙子監崑山州警敏詳審先有

僉人睥睨學宮屏斥諸生且立石以滅其跡八資刺下車慨

然以興復自任葺廟宇建采芹亭綵繪一新風俗丕變

姑蘇志

李羅帖木爾字存中唐兀氏至正辛巳監崑山州時初立都水

庸田司開疏河渠委帖木爾督役往來撫恤民皆安之修舉

文廟禮樂力善愛民有仁恕之風

縣志

史文彬丹陽人至正九年領崑山州事明年海寇犯太倉官軍

入海勦捕連數百艘文彬悉出官帑餽餉無擾於部前此兵

出將卒橫悍所過剽掠文彬嚴為禁制有卒稍橫令反接於

市鞭之置諸獄眾乃戢新孔子廟增弟子員勸督農桑均徭

簡訟士民悅服

縣志

邵肅字彥清山東人至正間任崑山州判官專職農事崑山田多窪下肅究心隄防勸勉程督衝冒風雨能與民勞苦增墾荒田若干隄既成潦不為災至今德之

縣志

費復初字克明壽張人至正間為崑山知州剛直廉明推心待人自延祐元年州治遷太倉至治丙申復移馬鞍山下學宮久廢復初拓舊址改築暇則與諸生講學不倦柯九思為詩

美之

縣志

僕僖斯高昌人至正二十三年知崑山州布政和平境內忠貞孝義之事多所旌表以州為張昭陸遜故封立廟以祀又葺王葆亭衡劉過及朱虎妻茅節婦祠墓置田給贍邑人賦崑

山五咏以美之

姑蘇志

徐石麟字仁甫蘭溪人至正間任崑山州判斷疑獄與水利征科有法事集而民不擾及退遂家崑山貧不自給不肯屈節以干人卒葬崑山城南盧熊誌其墓稱其出處議論澹然古

君子云

縣志

明

韶護岐山人洪武二十九年自戶部主事左遷崑山典史勤恪敏達事無疑壅後陞仁和知縣

姑蘇志

芮紳字子翔鄆城人洪武二十七年進士初知墊江改金壇三十一年改知崑山首革庫子祇候諸弊時催糧勾軍官校久

為民害取平民淹禁多死者翀悉解遣之復奏劾官旗娶婦生子於邑者朝命御史李嶽究治械送京師凡二百餘輩永樂元年坐事發遵化炒鐵者老王榮等伏闕訟冤詔馳傳還任復奏免包荒事故田糧十八萬三千有奇夏原吉治水蘇松採种策開吳淞江淤塞二十餘里以母憂去未幾陝西僉事馬祥奏翀才堪理劇吏部奏崑山固劇邑翀素得民當令再還舊治十三年丁父艱去翀為人雅正寬平務持大體略近名赦小過而幹局甚精前後在崑十八載精采彌著去之日民皆流涕姑蘇志參縣志

馬文炯山陰人洪武間以鄉舉除興化教授陞扶溝知縣歷刑

部郎中通政司經歷永樂十五年改知崑山政令明肅剛介有守武斷削跡胥徒畏懾視之如神明無何卒於官姑蘇志

羅永年字延齡宛平人洪武初序班歷兵馬副指揮宣德中知崑山縣弛張適宜下民賴之馬鞍山舊無樹永年遍植以栢歲久鬱然時人名郎官栢士大夫歌頌之姑蘇志

金華蕭山人正統初為崑山丞上官委勘災田至鄉見百姓貧苦流涕不食曰田禾雖閒有可望纔十之一二若報熟何以辦秋征乎同僚或為之慮華慨然曰脫有罪華自任之竟以荒白是歲得准災民不告飢鄉無盜賊及卒民悲思之

鄭達字叔通襄陽人宣德十年以鄉舉入太學授塾屋知縣浚

西洛峪水渠農賴以濟景泰五年蘇松大饑巡撫李敏奏乞
選能吏以拯民艱部以達應進六品俸調知崑山初下車見
飢民填塞衢路及閱濟農預備二倉皆無實積乃徒步走鄉
郭就土中戶勸令出粟得穀數千斛作粥飼飢者日再給已
而疫作復延醫療之每躬親督視民廬舍毀於水爲市竹木
并撤官府敗屋以給之春則給以穀種全活不可勝數時有
捕盜千戶不法擾民達發其事竟戍之爲人謙恭節儉樂善
好賢縉紳如鄭文康老儒若龔詡沈魯輦時時咨訪民事至
孝義貞節之事悉皆旌白焉天順二年卒於任文康爲狀其
事

黃員通字仕達南海人景泰間爲崑山主簿能識政體司征稅
公而有法邑人稱之

唐素字豫叔京山人成化初以進士知崑山下車卽芟奸剔弊
人畏其嚴明獄訟頓息三年調長洲六年遷御史歷官廣西
按察司僉事

楊謚字文寧儀封人成化六年以進士知崑山明敏有爲廢墜
修舉利澤及人者多去猶思之秩滿遷御史仕至兵部右侍
郎

余機字懋器臨海人成化十一年以進士知崑山寬厚簡靜不
尚苛察爲民任咎在崑山五年公過四十餘條俸恒不給久

之擢御史去之日行李蕭然未幾卒

紀智成化中由吏員爲崑山主簿質實有守官舍寂然如僧寮舉家食糜或不繼不少變也在官五年致仕

楊子器慈谿人弘治初由進士知崑山下車卽寘巨猾數人於法撫字小民極周至擇士之秀者親加教督過塾師之門或下車取童子課考之若子弟然暇則與文人耆老款接咨訪務盡其情表章先賢祠墓撤毀淫祠百區以其材充廟學公署用禁絕僧道巫祝游民及山神會尚鬼之俗爲之一變未及三年以憂去

方豪字思道開化人正德五年以進士知崑山己巳庚午吳中

大水郭門外一望巨浸野無炊烟死者相枕豪以民皆逃死不能催征便服自詣郡獄在獄具奏請如漢文減租兼停一切錢糧俟豐年次第帶征朝廷特從其請蘇松四郡及浙西三郡並免漕糧其疏橐及上巡撫書吳中至今傳誦之明年春雨妨稼會撫臣行縣豪徒步請勘走陷坎窞中民奔救哭聲沸地撫臣動容爲請於朝又得減半豪才思奇逸所至皆有題咏無何以艱去歷官福建副使

施德禎字天瑞餘姚人正德八年以進士知崑山縣遭水患屏隸卒親詣鄉保察被災者蠲其租平居自奉甚約性剛果令在必行摧挫權勢以是罹謗忿甚疽發背卒囊橐蕭然不能

殞殮僚屬縉紳爲具喪而歸

尹嗣忠字子貞神策衛人御史綸子正德十二年進士知崑山下車卽寘巨惡一二人於獄號令風行四境大治爲人不事表暴民多安之入爲刑部歷官兵部侍郎延綏巡撫

尔伊字汝任裕州人嘉靖十九年進士知崑山泣事明敏征徭有法不擾民而取辦恒先他邑爲人沈靜言笑不苟人不敢干以私在任三年歲連禱力請上官發粟賑救邑多囂訟方伊初至訟牒盈庭期而鮮再期而空矣擢戶科給事中旋卒石肯構南洛人嘉靖中崑山縣丞強毅有守未嘗受人一菜之餽人亦莫敢有餽者在任二年卒

祝乾壽字健卿應城人嘉靖三十二年以進士知崑山甲寅四月倭寇猝至由三江口薄城下乾壽乘城募民令壯者守禦老弱運瓦石與鄉紳王任用朱隆禧舉人歸有光丁允亨秦霑等共畫便宜諸生潘蔚卿晉日亨陳淮等率衆接戰柴秩柴輔元率合族三百餘人守東關斬獲甚衆又募死士往江口燒其船賊遂轉向西關攻益急城垂破乾壽執金鉦鼓之不爲動忽見一老父曰但沸桐油雜廁穢沃之賊可擒也如言試之果得渠魁二大王者縛旌竿射殺之賊乃解圍去及循城憩土神卜將軍祠其像卽西關老父遂上其事春秋祀之乾壽尋以艱去後擢御史崑民祀之卜神祠右黃岡樊玉

衝題其祠曰勝生爲之記

彭富字仲禮大理衛人嘉靖四十一年進士知崑山值大水後繼以疫癘民多流散富極意撫恤馭胥役甚嚴吏之司錢穀者稽覈不少貸俗多包攬豪戶蔡江沈詔等七人誘小民田總歸己戶每領運至京以積逋累人破產富廉得其實悉捕寘於法其害始息居官不受請託聽斷一衷於理有少年甲科與盜通富持之急其婦翁亦大僚也爲代請至屈膝者再卒窮治其黨而後已擢戶部去仕至四川巡撫

王用章字汝平祥符人嘉靖四十三年進士知崑山甫至按所部田賦及諸催督之籍一覽洞然于是詢諸父老定雇役之

法清改兌之弊免儲總之役期年民大悅會撫臣高頭糧長之議下用章廉知飛詭之弊爲領賦者害先清高甲嚴限推收令賣者不苦原戶催徵業主不苦客戶影射而二區之田盡出乃按田戶以編役隨高甲以撥運役均弊絕民皆樂業巡撫海瑞濬吳淞江工役浩繁用章應機立辦民間若不聞有役者聽訟晨至夕決遣無留滯公堂闐然嘗有鴈降於庭留止不去人爲賦來鴈詩以美之己巳庚午縣苦水災力請於撫臣漕米得改折性灑落能多飲而不醉嘗與士大夫從容山水間一以私請則毅然正色有鄉紳某父子懷嫌適園亭落成招令飲酒半用章忽曰今日欲鞫一公事問何

事曰卽公父子間事也呼其子出數其家事委細具知乃以至情開諭舉家請罪感泣誓終身慈孝因復飲極歡爲題其堂曰遂初言遂爲父子如初也三年報最民詣闕請留遷常州府同知仍管縣事前後凡七年遷禮部主客郎竟不赴歸李三省字思曾鄖陽人萬歷初以歲貢爲吳江主簿陞崑山丞承職水利邑頗年苦潦三省乘小艇循行阡陌間便宜修救未嘗受民一鮭一菜也有范某者煽惑人爲佛會誘淫少婦三省杖殺之妖風頓息初在吳江置一竹兜出入昇之及在崑山未嘗改易公服革帶常質子錢家吏部尚書嚴清稱之曰居官如李丞天下豈復有墨吏哉已而病卒邑民祀柳

塘祠

聶雲翰字搏羽曲周人萬歷二十年進士授崑山知縣身長七尺餘面方而黝心計口辯皆過人其治以抑豪強祛蠹弊爲主而才術足以副之將編賦役以爲非戶清則田不出非田出則役不均乃總其戶履畝校之先剔飛詭侵盜之弊自畝零以上至百千萬計造爲虎頭鼠尾冊分上中下三等定役於是賦役均平寂無譁者故事里甲之在鄉者爲排年在城者爲坊長凡上官經臨供具皆坊長職奔走煩費有至傾家者雲翰取庫銀自爲供具坊長之困永除繕修城隍所度丈尺及工費屈指可得人以爲神在任四年入爲兵部主事調

禮部告歸卒

樊玉衝字元之黃岡人萬歷二十三年進士授商城知縣調崑山初至取前令聶雲翰政牘視之喜曰我願爲曹參然每周思本末而損益之凡前令之釐革未盡者無不求爲盡善會當編審隱覆萬狀聶雖精敏必居別署鈎校累月乃竣玉衝獨以三日畢毫髮無爽問其術曰我何術我但於平居訟牒中默識其飛詭若干某田浮役某役浮田若干十得二三焉證以征逋之籍十得五六焉又詢之紳士試之老吏十得八九焉人自不可欺耳聽訟務平其情勝者不矜禿者無怨時方責逋賦長吏多奪俸崑山積逋至二十萬玉衝惻然曰民

逋賦時吾數齡耳今其人少者壯壯者老者老者死吾何愛吾俸而窮此不可究詰之逋哉其姑緩之然民服其恩信輸納恐後體素羸自奉至薄食不過乾蔬豆羹嘗乘小艇視水災與飢民相對噉菜粥甘之在官六年聞父疾卽告歸乘夜潛行邑人遮留不及後建祠馬鞍山巔稱之曰孝介先生民有疾走禱輒應但以雜蔬爲享至今猶然

陳祖苞字令威海寧人萬歷四十一年進士知崑山縣遇事果斷不畏強禦賦役蠹弊力加釐剔詭避無所容定田之水旱荒熟以爲徵糧緩急嚴丈量之法以正經界立法並可遵行嘗一署太倉再署常熟兩地之民交頌陞兵部主事歷順天

巡撫

以上皆縣志參王志
堅張大復名宦傳

錢肅樂字希聲鄞縣人崇禎十年進士授太倉知州嘗攝崑山

崇明事兩縣民皆立碑頌德

明史

本朝

○郭文雄字鳴上文水人順治十五年以拔貢授崑山知縣事皆自決不假手吏胥催科不遣一役摘欠之尤者揭之縣門而輸者恐後收銀盡革火耗錢糧解例有扣除鹽引開稱例有公稅文雄槩謝卻之崑俗囂訟多借假命陷人取財文雄著令凡犯殺人者必鄰里公舉得實始坐毋許一人首告漕卒肆橫力行官兌之令以禁約之尋以勞瘁致疾百姓為

設醮祈禳者日數處至禁屠十日有願以身代者竟不起卒之日藉草而卧布衾敝褥皆來時故物見者無不流涕士民醵金葬於馬鞍山之南立祠墓前私諡曰貞惠先生

○仇士俊安定人康熙三十年知崑山縣臨事精明人多畏服征糧嚴而有法時所在苦漕卒橫索士俊定每石加水脚錢十三文此外無所予遇強悍者率民捽擊之其害遂息會承審假命事上官囑其枉法士俊不從曰殺人媚人吾不為也竟以失出被彈去

以上皆崑
新志彙

○高鈐字重南廂黃旗人蘇州府同知康熙癸巳署崑山縣事勵精振刷禁游惰懲兇暴殲豪強疏冤滯未期月百度具舉

民俗爲之一變

王芾生高郡丞
玉山頌言序

蘇州府志卷第四十五

蘇州府志卷第四十六

名宦五

歷代縣令
僚屬附

常熟縣

宋

江康之考城人淹之父爲南沙令雅有才思

南史

何子平灤人世居會稽少有至行事母至孝元嘉末除海虞令

縣祿唯以養母一身妻子不犯一毫人疑其儉薄子平曰希

祿本在養親不在爲己問者慚而退母喪去官哀毀踰禮

宋書

鮑照字明遠上黨人少有文思宋臨川王愛其才以爲國侍郎

孝武初除海虞令遷太學博士中書舍人

梁虞炎鮑
明遠集序

梁

岑之敬南陽棘陽人五歲讀孝經每燒香正坐年十六擢高第

累遷武陵王府參軍太清元年表請試吏除南沙令侯景亂

率領所部赴援聞臺城陷乃與眾辭訣歸鄉里

陳書

唐

郭思謨太原平陽人以孝子徵拜安平縣丞內憂服闋轉江陰

丞又應廉讓舉擢武功尉秩滿遷常熟令凡佐三邑宰一縣

所居必化所在必理開元九年正月卒於官

唐吳郡進士孫翌撰墓誌銘

按此人諸志皆不載近有常熟人吳徵譽家藏此碑文凡八百餘字述其孝行甚詳天后命史臣褒贊特加旌表而史傳不載諸志亦無其名知古來闕畧者多矣因据其文增入焉

張旭為常熟尉因老人求判得觀其所藏書益盡其法詳見人物

劉太真字仲適金陵人

唐書作宣州人

弱冠以行義修潔詞藻瑰異為

蕭穎士所知廣德中以薦授左衛兵曹李栖筠在浙西表為

常熟令到官未期一邑自化歷官禮部侍郎信州刺史

盧志

蕭存字伯誠蘭陵人揚州功曹穎士子亮直有父風能文詞浙

西觀察使李栖筠表為常熟主簿

唐書

顏顥琅邪人魯公真卿之子也為常熟尉弟頤字仁純為吳縣

簿子孫遂家於吳

姑蘇志

李暎元和中為常熟令劉允文記新開常熟塘碑以頌其績

姑蘇

志

周思輯汝南人咸通間為常熟令歲旱禱於破山龍祠得雨邑人霑感皮日休記其事後為給事中

姑蘇志

宋

蔣文懌以朝奉郎試大理司直行常熟令事兼監察御史太平

興國三年錢氏納土後首任七年去任餘杭陸韶之作頂山

龍祠記載其政事

姑蘇志

王世昌字次仲許州人知鹽官縣改常熟轉運使張式以治狀

奏充秀州判官終都官郎中

盧志

晁宗恪字世恭以世父迴恩補將作監簿知常熟縣修學校理

溝防人賴其利

姑蘇志

范擴為常熟簿曾鞏舉其博學能文通經術敦重恬靜以母老

家貧樂仕鄉土堪充館閣及國子監直講任使

曾南豐集

郭三益字慎求義興人元祐進士才高有器識大臣屢薦之為

常熟丞常平使者調蘇湖常秀之人濬青龍江分地程役三

益所部前期告辦使者留之俾助他邑之不如期者三益即

引所部歸使者怒檄追甚急三益以為戚其母周曰青龍之

役連數郡其分地程役賦廩食皆已上聞今我先畢何名復

役之使者倘再思行悔矣雖然汝不可無往第無以所部從

可也三益如教已而使檄止丞勿來事遂已

盧志

李光字泰發上虞人崇寧五年進士知常熟縣朱勔父冲倚勢

宋史

暴橫光械治其家僮冲怒諷部使者移令吳江光不為屈

俞彥嶼知常熟縣建炎三年韓世忠帥兵自海道從縣赴郡會

張浚勤王四年元术犯郡李閻羅屯兵於縣彥嶼並周旋其

問

曾慎紹興中宰常熟立縣令題名碑王伯廣作宣風樓記稱其

知足以知勇足以行御吏若西門之治鄴愛民如子產之治

鄭云

姑蘇志

鄭穆字應和長汀人家無錫由定遠令改常熟丞攝縣事有潰
兵絕江由福山闖關邑人大恐穆單車撫諭遂皆革心有久

訟得直袖白金數斤為謝穆正色却之終朝散郎徽州通判

盧志

劉穎字公實衢州西安縣人紹興二十七年進士淳熙元年知

常熟縣有善政以治水利有勞特轉一官終寶謨閣學士贈

光祿大夫

琴川志

趙善魯字從之祖守江陰因家焉初調常熟尉侍郎劉穎參政

張伯孝俱見器重終朝請郎知臨江軍其居官於利民之政

則勇為之兩邑一郡皆有陰德

盧志

孫應時字季和餘姚人早從學於陸九淵登進士第為黃巖尉
有惠愛常平使者朱熹重之邱宥帥蜀辟入制幕改常熟縣

既秩滿郡將以私憾拮據倉粟累政流欠三千斛見問士民感德至相率擔負詣郡願代償不報竟坐貶秩為詩謝邑人云牛車擔負愧高義豈知薄命非兒寬至今人思之授通判邵武軍未上而卒盧志

葉凱開禧三年知常熟嘉定二年以平反冤獄得旨轉通直郎

修儒學刊琴川志修社壇琴川志

趙崇志字安伯嘉定八年知常熟縣十一年九月滿替作龍湫

亭宗人朝散大夫趙時侃記其畧曰操心誠律已廉為政無

愧於幽顯云鄧穀常熟志

惠疇字叙之江陰人知常熟縣劬農勸學擢良摘姦政以大成

曾丞相榜其閭曰景言以旌之姑蘇志

孫沂字彥溫丹徒人擢進士為常熟丞時長官有挾不屑民事凡所以下息田里之爭上應臺府之令惟沂是賴民有歲久不決之訟皆請於臺府願以屬沂旁縣亦然臺府既以為常沂亦不復計彼此部使者再委攝府學教授謝不就以疾丐

歸盧志

王爚字仲潛一字伯晦紹興新昌人嘉定十三年進士端平元年知常熟縣重建縣學教育言氏子孫正經界立役法修社壇創義阡嘉熙元年以職事修舉轉一官除提轄左藏庫琴川志

參盧志

王文雍寶祐中知常熟重修城圍及譙樓置刻漏創兩務官廳
濬市河福山塘築新隄葺亭甃衢飭整版籍

姑蘇志

元

孔文貞字從善東平人至元丁亥尹常熟歲大潦漂没田廬饑
孳流離文貞發廩拯溺全活甚衆明年躬督民疏港浦洩積
水注之江秋乃大獲邑賦數千石爲勢家所匿吏不敢問文
貞覈實其數勢家感其至誠遂盡輸納政在安民不邀浮譽
權勢貨利俱弗顧吏民咸畏愛之

姑蘇志

姚鎬字周卿邯鄲人元貞間任常熟主簿督視許浦永豐倉潔
已繩下芟櫛蝨蠹庾積殷實丁亥夏雨田陸混一富室閉糴

粟價翔踴鎬出郊勸分爭相割助督浚運河經度盡瘁按訟
平當馭吏嚴而有度不聽讒愬不畏強禦

盧克治字仲敬濮陽人大德間知常熟州沈毅宏遠復多仁恕
獄無冤濫好施勸分教育言氏子孫覈實學田築社稷壇拓
公宇增修邑志民爲立生祠今列祀學宮名宦祠

王英字世傑燕山人先任大同路推官皇慶初知常熟州事政
教修明訊讞詳允至於獄空

火失哈兒欽察氏由宿衛入官至治二年爲常熟州達魯花赤
凡州事悉倚辦於里正民有訴不勝役者數十戶乃曰里正
雖卑而責任易稱其力而均任之田不過一頃者皆釋不事

諸役皆倣此吏不得蚤緣規利未幾朝廷聞浙右田有賦存而無徵者里正歲代償至破產議勸富民助田以紓之擇火失哈兒視事乃得民一百五十餘戶田一千一百三頃歲入米六萬四千石又奉省檄勸富民平糶廉知田已鬻而抑派者居四之三凡為米四萬九千石有奇茫無可徵廷辨力爭卒得蠲釋轉徙就食者日來歸募民墾荒田八十餘頃歲增賦三千餘石開淞江浚練湖修大成樂令學官課講焉泰定丙寅滿去民請湯彌昌記其遺愛

段天祐字吉甫河南人泰定甲子進士選為常熟州判官有文學

班惟志字彥功松江人後至元間知常熟州能文工詩尤善揮翰

張成德字彥卿東平人至正間知常熟州政目紛複獨以重鎮浮民習用新征徭勸課有法數致老成詢察疾苦暇則命酒賦詠士庶愛頌之

盧鎮淮南人至正間以領兵副元帥兼常熟知州雖起武弁而崇奉儒術延邑士修琴川志時兵民雜居戢而不肆鎮之力也以上俱姑蘇志

明

李彰知常熟縣性寬厚有大畧洪武二年春邑人朱蝦蟆劫官

蘇州府志 卷四十一
庫作亂居民升屋以瓦擲之賊斃守兵踰城飛報蘇州太倉
二衛翌日兵至城下彰出迓之從容謂其將曰民爲盜民捕
之已盡衆來何爲吾已聞於朝矣出牛酒勞軍請駐以待報
詔遣王御史來視彰與耆民迎於境上具陳其故御史遂令
兵還民指謂子女曰爾輩李公活之也 姑蘇志

高瑞洪武二十六年爲常熟知縣居官有廉操嘗著敝袴隸人
戈孟遠竊見之納絹二疋於衙內瑞諭而鞭之加絹於項扶
出之人莫敢干以私 姑蘇志 參鄧志

柳敬中慈谿人洪武三十一年以登封教諭陞常熟知縣前政
久弛敬中隨宜剗治廢墜修舉田野開闢崇儒禮士政聲翕

然孔氏子孫有流寓邑中者貧不能娶敬中爲娶妻築室宣
化門外給產以養范文正公之裔少孤無生業爲築室廩食
之製衣巾具束脩俱學於邑庠永樂六年以憂去服闋吏民
詣闕請復任陞蘇州同知今祠于學 鄧志參管一 德常熟志

林暄仁和人洪武三十一年由監生試常熟丞守身謙潔保善
抑豪永樂五年以求賢陞袁州府通判 姑蘇志

陳瑗烏程人由訓導累陞大理寺丞洪武三十二年左遷常熟
簿永樂元年復舊任瑗爲人言簡而中理動止有則 姑蘇志

廖璉新淦人永樂中爲常熟知縣寬厚廉勤門無私謁民感其
政後陞蘇州府通判 南畿志

郭南上虞人初由縣吏授吳江典史築長橋有功除常熟撫民
 主簿逋逃復業者四千餘戶獄訟者不之令而之簿居四年
 改管糧弊除而課早集宣德九年常熟令缺知府况鍾與撫
 按論薦遂遷知縣南發濟農倉米募民疏通諸浦導江湖灌
 高原田洩湖水東注化汙萊為膏壤贖還貧民鬻子女償逋
 者百餘口以倉米貸民收時止課其本設義役倉每里出米
 五十石遂享十年之逸驅太倉鎮海二衛屯軍令民代種收
 租蘇州衛軍為暴并抑之禁鬼禩正婚喪橋梁器用莫不修
 飭府僚有行縣需索及盜支官鈔者發其罪不少假邑民獻
 粟甚甘南食而伐其樹曰後必有以進奉病吾民者正統八

年丁內艱歸十二年民請復任又一載告歸龔立本常熟志

唐禮字敬身武康人舉賢良方正天順初知常熟縣文雅有為

重建子游祠道愛亭立進士題名碑姑蘇志

甘澤字洪濟開州人天順間以進士任御史左遷滁州衛經歷

成化元年巡撫劉孜薦陞常熟知縣食正五品俸剛方有為

豪猾屏息其治以嚴稱嘗修學宮重建東南二倉造倉畔二

石橋四年以事罷鄧志

鄧琪字弘中閩縣人成化初以進士知常熟縣首誅姦惡以剛

果稱九年陞南京戶部主事姑蘇志

蘭玉字廷璋趙州人由進士知常熟豈弟清謹慎於聽獄未嘗

以私刑一人在邑有惠愛民謠云好爛肉富常熟成化十三年北觀卒於京

王綸字大經開州人弘治三年進士授常熟知縣淳靜簡易於監臨平心事之不承迎以干進事至不辭劇易訟牒可論則決遣或委者民理之多平服歎歲躬出勘災煮粥以食饑民待吏嚴整無偏聽歲漕如期而集任內鮮逋賦以學法整諸士得其俊異而禮之號舍不能容闢地構屋與居遷衢州通判又遷山西沁州知州以上俱鄧志

楊子器字名父慈谿人弘治初知崑山有惠政以憂去服闋補高平以巡撫朱瑄薦調常熟涖任未久風采一新教民築隄

捍水流亡者名之復業田稔而后稅之立歲徵法先入者免贈米越三日量免之不數日米入已盈數萬折糧銀往時隨糧以納至銀貴米賤而傷農子器諭小戶以米轉易事畜養紡織春半而輸凡輸銀近在堂廡監收者不得橫取徭役視其丁力始至即名里胥民圖所居方向籍書事產丁力審役日按籍而定之靡有自匿者邑校素稱多士子器親為講授月朔集之課試雖祁寒盛暑不易期行鄉飲賓禮其有年行親造其廬為鈞敵禮鄉賢張修撰女孫許人為妾子器取以嫁先賢言氏之後而躬臨其婚冠婚禮以廢每月朔望召儒士張堯民林傳季鶴輩講肄于社學訟者許投牒即日閱之

揭名氏於縣門里正傳集候審至則片詞而服罰取懲而不
殘戶小大人賢不肖舉知之自其視象病者不禱於祠游惰
不飲於市爭者不鬪於道威行信孚政稱神明其尤無賴怙
終者板書其名於縣亭准古式修大成樂卓然有古循吏風
名入為吏部考功主事歷官河南左布政

鄧志參
龔志

秦禮字從節臨海人弘治十三年以進士知常熟縣性淳厚政
不立異凡前令楊子器規畫守之不變事至平心決之民安
其治素恬泊不喜事迎謁有不樂者上官入其言改知鉛山
邑人感恤之後為河南按察僉事

鄧志

計宗道字惟中馬平人舉進士弘治十五年知常熟縣英果有
為濶達持大體臨事有定見不可奪遇歲歉輒先事具白上
官議蠲減知府林世遠甚重之邑諸豪猾常營事役罔官府
宗道燭其姦終無所聽信居三年稅足而事集操履清慎於
民有威愛暇則糾名流相與觴咏諸生有詞學者厚禮之遷

延平府同知官至衡州知府

鄧龔二
志合纂

胡巍字世高開州人由進士正德五年知常熟縣渾朴慈祥三
載考績上官以糧役逋完為限巍曰寧棄官不可殺吾民劇
盜劉七將至福山鄰邑令有以家屬寄遁巍不為動八年行
取卒于家

管志

張濬字深甫黃縣人正德九年以進士知常熟縣縣理久弛強

宗撓法病民濬持法無所徇厨傳簡約居之晏如當盛暑循行郊野致疾卒行橐蕭然鄧志

劉乾亨字汝嘉洛陽人正德十四年以進士知常熟縣政尚威稜然亦不事苛察治辦而民不擾滿考遷戶部主事鄧管二志合纂

俞浪新昌人正德十六年由監生為常熟丞識畧優敏臨義敢為工為詩政暇不廢吟咏白茆之濬將錄其功為上官所抑坐以小法會丁父憂去後浪奏理前事得白聽致仕龔志

王繼禮字行之文縣人以進士先任阜城令嘉靖二年改常熟端已臨下寡嗜慾人不得窺其際賦役多因前政之善不務更張以示才出語必信有為必果邑多巨室莫敢干以私布

袍蔬食一切泛費皆停罷民樂其不擾而敬其清方名為監察御史鄧志

胡鳳字文明黃梅人嘉靖六年以進士知縣事催科不嚴而集決獄各當其情律已尤嚴遷南京戶部主事鄧志

徐澗字景宇淳安人嘉靖九年以進士知常熟縣性明察臨訟一見而決往時定役以其書付吏滑吏得高下其等澗既定其役揭之縣牆使人共知應役與免吏不能售其姦縣有積

逋數萬多漁入者澗逮繫而徵之尤嚴治惡無所縱舍有沈欽者兄弟以鹽盜橫一方澗踪跡捕得之斃獄中徐達者名

健訟善嚙人澗捕治論死性不能媚上坐是久不進考滿得

蘇州府志 卷四十一 名宦五

荆州通判遷南京考功主事鄧志

沈弘彝字君叙陳州人嘉靖十二年以進士知常熟勤於職業

晨興視事宵燭而後入凡徵稅役法擇前令之善者用之衙

前公費視往時多所裁減吏有玩法者立治不少貸濱江盜

發前後擒其雄猾餘黨散去縣境以寧均田檄下弘彝供事

有勞以薦為戶部主事鄧管二志合纂

馮汝弼字惟良平湖人嘉靖壬辰進士授行人擢工科給事中

以疏劾吏部尚書汪鋐謫潛山丞十六年遷常熟知縣時方

奉旨丈田當事者互相觀望汝弼毅然立法清丈閱三月事

竣田無漏籍戶無虛糧然竟以是為同列所忌被論調去管龔

二志合纂

王鈇字德威順天人嘉靖二十九年進士授常熟知縣濱海多

大猾匿亡命作姦鈇悉貫其罪倭患起鈇語諸猾曰何以報

我咸請效死於是立耆長部署子弟得數百人合防卒訓練

縣故無城鈇率士卒城之倭來薄數禦却之已自三丈浦分

掠常熟江陰參政任環令鈇與指揮孔燾分統官民兵三千

破其寨斬首百五十有奇焚二十七艘餘倭皆遁復掠旁縣

將由尚湖還海鈇憤曰賊尚敢涉吾地邪必擊殺之會邑人

錢泮忿倭蕪其父極力從與鈇乃用小艇數十躡倭倭夾擊

之隘中獨耆長數人從皆力鬪鈇陷淖瞋目大呼腹中刃死

時三十四年五月也詔贈太僕少卿廕錦衣世百戶遣官諭

祭立祠死所歲時奉祀明史忠義傳 縣志鈇與錢泮追倭中伏處地名讓塘鈇沒後邑民見其

家人力不能還乃留其弟若子占籍邑中先是三十二年倭入福山港時主簿李宗昭二僕一名李安一名李某攜刀弩

偵賊遇賊八人安縱弩殪其魁復揮刀殺二賊賊方惶怖而安墮塹被刃死某奮勇獨戰頸中二刀氣愈厲賊大駭引去

黃嘉賓崇安人嘉靖三十八年以進士知常熟縣頻遭倭患繼

以旱澇嘉賓撫綏瘡痍輸賦者布縷雞豚皆收納發摘姦伏

如神會捕治海寇吳宗鹽使袁某入宗賄誣逮嘉賓幸輿論

保持之然未及給由量遷戶部既去民思之至萬歷丁未始

祀名宦祠時有一父老扶杖匍匐云少遭冤獄遇公得釋望

木主且泣且拜哀動路人龔志

王叔杲永嘉人進士嘉靖四十二年由靖江知縣調繁常熟清

敏和易尤善形家言建文學書院重造縣衙移鐘樓於吳方

皆工作之鉅者而不以煩民後又備兵蘇松

張集義餘姚人進士萬歷十一年自丹徒調繁常熟慷慨任事

修城浚川不避勞怨更變役法每區以一人掌賦而各用經

催佐之重差通融均派後皆遵行陞兵部主事

段然號幻然江夏人進士萬歷二十六年知常熟沈毅多謀咨

聘布衣顧耿光待以賓禮稽覈賦稅宿蠹一清凡得乾沒之

額三千石有奇歲大饑詔蠲租五萬餘石用耿光計災黎悉

沾實惠築隄導渠改倉造獄俱有規制東南屢苦澇然清刷


宿逋創公租法秋成日俾里正循行分收充額而止官民兩便

趙國琦字伯玉南昌人進士萬歷二十七年自廬江調繁常熟操守清謹嘗親行阡陌察覈荒田又以額派餘米三千石抵坍荒稅用彤家言改闢縣門創譙樓砌甬道居三載擢刑部主事後官至參政

譚昌言字聖俞嘉興人進士萬歷三十年知常熟天資英敏剖決如流歲當大造契稅例有三四千兩悉免之平徭役却餽遺士民莫不愛戴會青衿變起郡守引疾昌言改調婺源虞山劍門之崖鑿去思石三字以志德以上俱龔志

耿橘字藍陽獻縣人進士萬歷三十三年知常熟縣首復子游書院浚福山鹽鐵李墓三丈諸塘浦工畢而民不擾所著常熟水利全書傳於世錢志

楊漣字文孺一字大洪應山人萬歷三十五年進士除常熟知縣初至與城隍神約所不秉公而狗紳豪者有如日竟漣之任竿牘絕跡凡為姦猾亂治者皆收案致法常徒行阡陌間問民疾苦慰勞如家人父子築雲和石塘五十里以遏暴流免病涉坊里供億繁苦捐公帑代之創復文廟樂舞設義塾於各城備脩脯延師令貧者就學俸薄不足贍家口其兄賣田以資之五年入覲毀所束帶以辦裘舉廉吏第一擢給事



中歷左副都御史抗疏劾魏忠賢二十四大罪被逮斃詔獄
崇禎初贈太子太保諡忠烈邑人立專祠于雲和塘旁

縣志參錢

謙益楊公墓誌

楊鼎熙京山縣人由進士崇禎元年知常熟縣能理繁劇按牘
日常累百剴決如流初常熟漕法不一大戶易輸而鄉民倍
肩其難鼎熙言於撫按一例水次輸兌勞逸乃均勒石永遵
在任九年左遷去

錢志

本朝

○湯家相字泰瞻趙城人順治六年進士八年授常熟知縣初
至率士民矢於神不受一錢爲政以撫流亡植善類爲務有

積案繫獄者數十人家相知其無辜取牘焚之囹圄一空每
視事霽顏問民疾苦有言利弊者悉得前期年坐前官逋賦
罷百姓聞之爭先輸納一夕而足撫臣白其事復官補南漳
知縣

○趙育溥沁水人康熙初由五臺教諭遷常熟知縣至時隨一
蒼頭布袍襪被而已催科弗予杖但勸之輸上官讓之育溥
曰與其督責而飽隸橐不若寬之使悉入公家且貧民或鬻
子女以償一官何有忍敲扑以博最乎民間感悅賦入逾他
歲以舊逋罷去民惜之

○于宗堯字二巍廣寧人康熙七年以父廕除常熟知縣時年

甫十九人或少之及視事聽斷明察勇於為治興利剔弊雖老吏弗及先是收糧兌糧責成里民漕卒驕橫索取無厭民不能堪宗堯到任三月大集糧里誓於神力行官收官兌之法漕事不為民困自宗堯始性孤介屏絕餽遺搏擊豪強無遺力而待良民慈恕三年如一日卒於官合邑為罷市男女皆巷哭醵金治其喪負販者爭投一錢將北歸百姓號泣挽留葬之虞山南麓題其阡曰萬民留葬邑人瞿式鼐捨宅為祠在慧日寺西

○林象祖字愧蓼晉江人進士康熙十二年知常熟縣敏練有才畧時疊遭水旱又當逆藩之變軍需孔亟象祖撫綏七載

事上使下無不欣悅特擢科給事中前此吳中州縣官皆

為錢糧誑誤遷擢自象祖始以上俱錢志

○揚振藻字起文永平人康熙庚戌進士初宰山西祁縣二十

四年補知常熟忠信剛方吏畏而民懷之再調廣通擢工部

員外郎卒於京邸至不能備棺衾邑人蔣廷錫為之殯曾倬常熟志

○陳守創號木齋高安人康熙甲戌進士六十年知常熟縣守

創歷官以廉慎著稱至則罷差役絕請託革耗羨輸賦者使

自封投櫃不拆封即解郡相驗命案祇攜一吏一役駕小舟

以往民無橫索之累日坐內堂洞開重門訟者皆得至前大

則令其自拘訊明即結小則開諭解釋甫三月奉

召入京邑民相率詣上官乞留後歷倉場總督順天府尹副都

御史

吳江縣

宋

馬尋字子正鄆州人祥符初以明經登進士授吳江簿出京日

兄彝戒之曰到任半載可誦律書為治民之本到官後彝至

縣詰之答曰縣當衝要疲於送迎未暇及也彝不懌尋乞緩

期諷之至冬果精律學尋登朝籍久參法寺有平允之譽累

致治聲彝之力也

盧志

張先字子野湖州人康定初知吳江有惠政詩格清麗尤長於

樂府仕至都官郎中

姑蘇志

李問慶歷三年以大理丞出知吳江與尉王庭堅謀建長橋後

世賴之其他美政甚多

莫旦吳江志

王庭堅字世美慶歷三年尉吳江政稱平允與令李問議率民

輸錢得數百萬欲建廟學會有詔不許遂移其材建長橋民

甚利之錢公輔作記以精敏沈毅稱之

姑蘇志

孫覺字莘老高郵人治平三年夏以民曹掾權吳江縣有江橋

延袤二百許丈役大難集覺募民修治之勢愈雄壯又河塘

兩岸前政科買竹篠數年一修易敗而濫致潰決覺市石增

築遂得支久祠廟廢缺者新之復葺如歸垂虹兩亭詮次邑

中留題百餘篇為松江詩集盧志

林肇字公權莫志云吳興人寶元中進士熙寧三年以尚書屯田員外

郎自請知吳江始至覽江湖之勝緬懷古人慨然有歸歟之

興乃即松陵勝處作鱸鄉亭繪三高像其中既落成遂具舟

由亭下拂衣而歸盧志

陳瓘字瑩中沙縣人元豐三年進士除吳江主簿

按盧志云徽宗朝瓘自正言遷右司諫數言時事天下想其風采政和元年再被謫降主吳江簿未幾卒贈諫議大夫諡忠肅松陵文獻据宋史本傳及年譜俱無謫吳江簿事因力辨舊志之誤今按中吳紀聞載陳了翁鱸鄉亭詩言了翁初主吳江簿嘗賦詩云云且謂了翁筮仕之初已無戀官職之意據此則了翁之主簿吳江在初釋褐時盧

志誤以為後來謫降耳松陵文獻未見中吳紀聞遽辨了翁未嘗為吳江主簿亦疎矣

程俱字致道信安人元符中為吳江簿政平訟理優於文學作

松江二賦三高祠詩序遠近騰誦之卒官中書舍人姑蘇志

徐勣字元功南陵人舉進士元符中調吳江尉仕終顯謨閣學

士勣挺挺持正為徽宗所禮重而不至大用時議惜之宋史

向子韶字和卿開封人元符三年進士知吳江縣蘇人私鑄黃

錢流布一路諸邑聽民自便知州是之子韶騰書極言其害

下令禁之無敢犯者已而中司論其事詔置獄繩故縱之吏

諸邑皆曰太守命也吳江令嘗力爭書具在子韶聞制使來

自謂被逮具舟束裝以候吏及門即行初知州意子韶必以

蘇州府志 卷四十六
抗論不從爲功子韶至卒無一言獄成知州以下皆貶秩子韶獨賞一官後知州孫傑名諸邑議欲一大保置一鼓樓保丁五人以備巡警盜發則鳴鼓以聞子韶曰一大保二十五家而已如吳江外鎮有合境不過五里者無慮數百家若二十五家置一樓則不可勝計矣又以數十人持梃更巡其間有强悍不逞者遞相侵凌則鬪爭自茲始不可爲也知州必欲行之子韶持不可久之卒如其言大觀三年除開封府右曹參軍靖康中知淮寧府與金兵巷戰舉家被害贈通議大夫諡忠毅盧志

石公轍字道叟新昌人紹興二年特奏狀元任南劍州教授轉

吳江令初學宮在縣治西南厄於兵公轍以東門外開江營

舊基改建又置田以養士卽今學也後通判平江府陞大宗

正姑蘇志

李衡字彥平江都人登進士第授吳江主簿有部使者怙勢侵

刻下民衡不忍以敲朴迎合投劾去宋史

趙公廣字德儉淳熙四年新縣志云當在乾道三年任吳江知縣重建廟學

及郵亭使館橋梁祠宇皆一新之遷徐州同知姑蘇志

莫若冲字子謙父琮仁和人建炎中避地家秀州之崇德若冲

淳熙二年進士湖州安吉尉常州教授知安吉縣政稱平允

改知吳江縣撫字尤有聲歷司農丞知岳全二州以最聞除

大理丞盧志

徐偁道字淵子天台人早負才名為吳江尉受知范成大及為

秘書少監朝聞彈疏以舟載菖蒲數盆書兩篋翩然引去盧志

張達明嘉泰中知吳江政平訟理作無訟堂公暇從容與賓客

論詩後官至右丞吳江舊志

袁韶字彥淳慶元府人嘉泰中為吳江丞蘇師旦恃韓侂胄威

福撓役法提舉黃犖檄韶覈田以定役師旦密諭意言吳江

多姻黨儻幸相容當薦為京朝官韶不聽是歲更定戶籍承

徭賦者皆師旦黨師旦諷言者將論去犖亟以是事白於朝

且薦之未幾師旦敗改知桐廬宋史

呂祖憲東萊人祖謙之弟嘉定五年知吳江縣重修學宮有記

刻石姑蘇志

元

王柔字不剛大都人試安西王相府令史至元三十年授吳江

尹修繕官宇重建廟學及三高祠施政條理井然姑蘇志

哈刺哈孫大德九年同知吳江州事嘗語人曰牧民之官不忠

勤何以盡職分不公正何以聽獄訟不慈仁何以得民心歲

荒且疫為之流涕白州長留粟救之曰寧拂上意以受責毋

令民失所也

皇甫璧字君寶東平人至大三年知吳江州三載以廉能著不

事智數政無矯飾待物一於誠始勉以文教申之以禁令人莫敢犯

高仁字壽之濟南人知吳江州以大義曉百姓譁健束手而怙終必刑歲役先鉅室力稱事辦行省賑杭饑命增州糶三萬石仁抗言州小數已溢不可增鹽運司課虧省委仁詣浙西取補於民仁言民貧不可妄動事並寢延祐二年經理田糧省檄仁往丹陽金壇兩縣公田舊額虛者七千仁曰朝廷豈利無田之租哉閱實悉除之

張顯祖泰定元年為吳江州判官重建長橋撤去木柱為石竇六十二每竇用鐵鉤八條長十三尺重四斤仍布紗榜於水

底築址以防傾圮畢功晏犒工人甚厚

以上俱姑蘇志

段廷珍至順三年為吳江州判官決事如流恤民如子

徐師曾吳江志

干文傳後至元六年由婺源州改知吳江州以均徭賦為先催科立程限民亦不違邨落之間不識吏胥至正三年召為集

賢待制

縣志餘詳吳縣人物

那海高昌氏至正五年由中書舍人為吳江州達魯花赤養民

以惠興築石塘水利甚溥

姑蘇志

明

孔克中字庸夫宣聖五十五代孫吳元年知吳江州洪武二年改縣克中仍為知縣時承兵燹後庶事草畧民俗鄙夷克中

日諭民於理葺遺舉廢常如不及重建縣治及垂虹亭三高
三忠二祠應祀廟壘罔不修飭一邑爲之改觀吳江舊志

廖欽字敬先吉陽人洪武四年授河內縣丞以忠信化民調吳
江有隄護田數千頃久廢勢家互爭奪不決聞於朝令官爲
修築責期甚迫同官皆以他事避去欽獨詣隄所計工費召
民諭曰隄成民受其利不成我受其禍民相戒戮力至期隄
成欽精敏吏抱文案叢襍手署口決頃刻畢秩滿去會河內
有舊虧課錢典守者誣欽遂謫役鳳陽河內吳江之民間之
皆來爲欽助役旣而釋歸吳江志引解縉墓表
蔣奎南昌人洪武末主吳縣簿三年陞知吳江縣政號平允卒

於官姑蘇志

陳耘福山人洪武三十一年陞吳江簿涖政廉平民信之後陞

監察御史紹興知府致仕姑蘇志

陳敏仁和人建文末爲吳江縣主簿明果而恕永樂六年陞刑

科給事中松陵文獻


邢寬直隸人永樂十年知吳江縣撫字有道民銜其澤後陞成

都知府姑蘇志

李昇榆次人永樂中爲吳江丞十三年上疏請疏太湖下流以

除蘇松水患詔從之明史

賈忠字能誨冀州人永樂初以諸生守城功授寶鈔司提舉宣



德中累陞吳江知縣忠有兼人之才處已廉明臨政勤恕八年秩滿赴京邑民千餘上章請留加從六品祿復任後忤當道同僚因誣執之忠不辨而退

松陵文獻

葉錫字元圭永嘉人正統元年知吳江縣以廉謹聞未幾以母

喪去改知吳縣

詳見吳縣志

王懋本金谿人由吏為吳江丞以剩員召還民奏保其廉能乞

留之尋以憂去正統十年十二月民間其服闋相率伏闕請擢為知縣吏部言其以吏出身非例也上曰懋本既能令民

有去思吏何足計其從之

明英宗實錄

劉彪湖廣人以吏授吳江丞景泰六年陞知縣居官不挈家累

以廉幹稱

姑蘇志

陳堯弼字秉均太和人成化十七年以貢士知吳江明年錦衣衛千戶王臣同內侍下兩浙市珍寶威燄薰炙至吳江挽船夫役至數百人索千金佐貳皆走匿堯弼力與抗邑人鼓譟從之奪其器械遂避去巡撫王恕聞之即具奏磔於市繼有奉命取製衣梅者一梅費銀一兩民間梅樹悉縣紅牌邑人惶恐堯弼令伐樹以滅跡使者怒堯弼曰君往浙江幹辦吳江非浙地也果有朝命當以公移下之豈可私懸牌以擾民邪其人語塞而退尋以憂去後官至太僕丞

松陵文獻

金洪字惟深鄞縣人成化中進士知靖江縣弘治四年調吳江

時吳中連年大水邑人給事中葉紳請疏通水利朝廷遣工部侍郎徐貫偕巡撫胡鑑知府史簡浚治議開白茆港等處吳江當役夫一萬八千餘名會嚴冬雨雪不堪遠涉洪乃請留以通長橋水竇決去填淤墾除葦荻導太湖水以入吳淞江人日給米二升親乘小舸往來督率民不疲而水患息訟牘盈几不移時而決公暇從邑士大夫飲酒賦詩以爲常在任六年撙節用度歲減各款橫斂銀共二十萬兩預積米至二十七萬三千餘石編戶增至十二里九年陞監察御史正

德初知松江府

葉燮吳江志

王鑑字克明吳橋人弘治三年主吳江簿守已廉潔常祿之外

一介不取其弟自故鄉來遣歸太學生申顯知其無貲饋粟

一斛已而弟卒召申生還之每公宴同僚皆錦繡鑑獨衣布

袍殊無愧色在任九年滿去邑人爲作清官歌

松陵文獻

徐欽正德末主吳江簿仁恕廉明凡刑罪人每至泣下遇水旱

齋戒祈禱多獲奇應卒於官邑民卽城隍廟西廡立像奉焉

吳江舊志

張明道字希程羅田人嘉靖己丑進士授都察院都事謫滁州

判官十三年擢知吳江縣時豪右橫甚明道始至卽誅其桀

黠者餘遂斂手邑賦歲數億萬前令取常例於糧長丞以下

效之明道爲文矢於神一無科率縣當孔道使節旁午餽遺

少減則謗譏與明道一切裁省曰剝民以求名吾不忍也民以訟至今自拘訊非大事不公差或骨月忿爭名至以至情論之令感悔乃已朔望視學與諸生講析經義葺社學選鄉師童子俊秀者倣古制作禮衣衣之祠廟橋梁所在繕飭期年名爲刑部主事臨行止攜來時兩敝籠而已士民攀號若

失父母仕至江西按察副使

松陵文獻
葉志合纂

喻時字中甫光州人嘉靖戊戌進士授吳江知縣吳江財賦甲天下吏積爲姦弊時具得其狀嚴立法程桀黠者無所施凡上下符牒鏹一大櫃中手自封發左右欲伺隙不得也案牘填委片語立決所捕治皆大猾姦徒帖息庚子旱蝗民饑設

糜發廩齋宿露禱忽澍雨蝗盡死仍請於御史以贓罰等羨金充歲課缺額民以大甦接人和霽泣事則嚴不可犯苞苴請謁一無所入早起卽束帶趨聽事夜分而入寒暑率爲常議者以清惠慎勤槩其治行徵入爲御史終南京戶部左侍郎

王國光字汝觀陽城人嘉靖甲辰進士丙午知吳江縣性廉介常例火耗與公堂餽一切蠲之量民賦役吏不敢詭善剖紛糾他邑有獄積歲不決者國光一訊得情吳俗侈靡物力殫屈國光躬自菲薄節浮費禁餽遺以勵其屬民化之居二載以憂去萬歷初官至戶部尚書

楊芷字文植安陸人嘉靖丁未進士癸丑知吳江縣值倭分抄內郡吳江四面阻水城隍卑薄芷急鳩工增葺作隄夾浦立堡唐湖凡險阻要害並以木柵鎖截造戰船百餘艘大爲中軍次爲左右翼次剪網爲游擊方連相接防扼甚密又令農民分休且耕且守流亡漸歸連年用兵資儲不闕屢破賊於瓜涇平望盛墩等處芷功居多在任三載出入兵間剗割吏事無廢陞南京戶部主事遷兵部尚書

李遷梧字茂陽安邱人嘉靖三十八年以進士授吳江知縣自倭難後瘡痍未復遷梧與民休息一切罷去科條民有陳訴就道傍決之明年東南大水邑爲甚遷梧捐俸設糜所活無算時巡撫奏請蠲稅爲部議所格先所遣漕郎勾校如故遷梧歎曰賦出於民今百姓畢力障水猶不給忍驅之鬻妻子供箕斂邪於是閉閣待罪悉停諸催科或上官譴怒符攝里胥卽去冠帶攜囚服以往御史聞而賢之表其事爲七邑最壬戌四月邑中火延燒公堂遷梧急徙獄囚移帑藏斂圖籍頃之風反火滅乃取倉庾舊材及罰鍰以新公堂遷梧爲治不要名譽不尚敲朴一本至誠胥吏亦不忍欺在任三年邑大治後萬歷丁亥復大水士民追思其德設木王城隍廟祀之又十餘年知縣劉時俊始請祀於學宮

吳一本字仲立沔陽人嘉靖四十一年進士授吳江知縣時兵

荒泆仍人民凋敝一本奉公潔已徵賦有法吏無所售其姦往時里甲貯丁田之羨以供交際問遺諸費一本捐俸以給之不以斂民邑中水兵外又有弓手一本曰二者兼設是倍費也乃去弓兵代以水兵無事散之各司有事則聚之邑以爲扞財節而用不屈名爲工部主事

王一言南城人萬歷二年進士自太湖縣調知吳江清廉鎮靜聽訟明而不苛催徵不煩箠楚亦不至後期吏人欲爲姦利無隙可乘多徙業散去七年大水一言請緩征忤上官意被劾去後累官南京通政司參議

徐元字善長杞縣人萬歷庚辰進士知吳江縣初至歲大稔上官檄督賦急元曰民方枵腹而敲扑之不轉溝壑必且爲盜力請緩徵民不病而賦亦集元爲人廉明坦易時與邑士大夫賦詩飲酒民間疾苦亦無不周知獄訟片言立折抉弊剔伏吏胥莫敢欺在任六年入爲監察御史民建祠垂虹亭南立碑鐫像祀之

祝似華本姓黃字隣初內江人萬歷己丑進士由儀真調知吳江吏民初以其年少易之及視事明敏練達乃驚服勾稽隱漏禁戢姦欺均平徭役節省供費凡有益民者無不舉操守清介請謁盡絕搏擊豪右催徵先巨室而緩小民湖州尚書董份占籍吳江其蒼頭暴橫似華以法繩之不少假三年陞

台州同知

以上俱葉志

劉時俊字恒甫富順人萬歷戊戌進士知廬江桐城再調知吳江爲人豁達精敏往時催科以盈爲辦黠者陰屬姦胥匿其賦良民至有十限三分之輸時俊先造烟門冊凡田畝貫址戶口令民占實填報因洞悉田賦利病遂以八限五分爲準黠者無所隱匿凡督宿逋者時俊知上下吏胥交通爲姦每遇上檄下卽併任事吏解之而姦革漕卒獷悍橫索無厭時俊請漕撫約束每百加四石槩量之事令耆老主之軍第持籌而已有浮圭合者扶以狗歲省米二萬石邑塘當孔道歲修而圯愈甚時俊出羨金又勸富室輸助及免役錢得四萬

餘金築南北石塘延袤八十里爲邑永利其爲治嚴而不苛聽訟請託不行表章節義敦禮耆碩每望後一日角巾至學宮與諸生質疑問難竟日而罷月以爲常見訟牘有婦人名卽除之或婦人以事至戒伍伯離丈餘久之事省訟簡盜賊屏跡吳俗好賽五方神每歲演劇月餘男女雜沓無賴子或乘之以道淫賈利時俊嚴禁之杖其爲首者投神像於太湖稅關至杭州所過邑令皆長跪時俊獨不屈索供億又不應闖怒去未幾檄至府以昨歲過金閭失上供物誣吳江巨室五十三人爲盜知府錯愕無以應時俊曰此詐耳某請以身當之闖使方入縣咆哮時俊命縛而訊之曰據檄事在前年

今始發何也且其時爾主在徐州道上乃來吳邪與大棒數十閹使懼具伏誣狀盡寘之法閹見爰書語塞卒無以加也在任五年治效異等陞南京兵科給事中官至大僕少卿

參松陵文獻

晏清字泰徵黃岡人萬歷己未進士知蕪湖縣調吳江清有器度聽訟大事立剖小者則徐之使自解和易近民而嫉惡甚嚴邑有巨寇肆其毒螫清捕而寘之辟天啓四年大水單舸勘荒力請上官得以災上聞全漕改折所省耗贈米八九萬

石銀四萬金擢禮部主事仕至吏部尚書

葉志

熊開元字魚山嘉魚人天啓五年進士知崇明縣崇禎初調吳

江開元年少有才畧始至革供張慎筦庫吏不得緣為奸民苦糧運為定例使南北相均覈隱田約漕卒講求農桑水利留意人才好甄拔孤寒士切劘以文章道義旁及他邑翕然師宗之四年陞吏科給事中以考成舊案追論謫官稍遷行人司副十五年以面劾周延儒廷杖謫戍後入閩中累遷隨征東閣大學士言事不合即乞身歸入山為僧以終

葉志參松陵文獻

葉翼雲字載九福建同安人崇禎十三年進士知吳江縣初至歲大旱蝗緩征平糶捐俸設粥步禱龍祠日行數里立法驅蝗蝗皆墜湖死是歲雖災不害時議者以國帑誦欲因畝加

賦翼雲條上其不便所省六萬周行城郭相度形勢令城外
 四周皆康衢可馳馬其上增築臺舍嘗自我服閱兵郊外夜
 復巡行闐闐間十七年夏北都變聞不軌者洵洵思亂翼雲
 廉得其主名立捕殺之一邑帖然遷刑部主事乞歸閩中建
 國擢稽勳員外同安破被獲不屈死闔門遇害

松陵
文獻

本朝

○趙子三字海秋乾州人順治戊子舉人辛丑冬知吳江縣清
 簡寡欲寬猛並濟徵輸一月分立兩限用紙皂紙柳省差役
 又設順櫃聽好義急公者不限完納設頑櫃聽前月未足限
 者不時投納一時稱催科良法聽訟明決枉直片言卽剖讞

語當堂立成以註誤去士民惜之建祠勒碑

葉志

○劉定國字奠萬奉天人康熙三年以廕授吳江知縣縣當南
 北孔道師行所過繹騷民多竄徙定國具牛酒待境上至則
 犒勞將士他有求弗與也有擾民者必以身捍禦大帥亦斂
 威去聽訟明敏犯者卽決遣案無留牘嘗視獄囚止三人訊
 之當遣戍者明日卽令就道獄爲之空賑恤貧民繕城垣治
 塘路修垂虹橋築學宮牆建名宦鄉賢祠葺縣治譙樓邑爲
 改觀遷高郵知州行至郡疾卒民追思之祀名宦

舊府志

○霍勳字立卣清苑人康熙三年進士十四年授吳江知縣軍
 興後民力凋弊勳寬徵比絕差役聽訟不聞敲扑繫獄者日

給米冬給衣絮置草薦以藉之苟可求生路必爲平反未期
年丁內艱解任出署襤被無餘物各項賠墊缺額銀三千兩
邑人爭先輸助一月而完貧不能歸淹留邑邸已未七月望
夕忽起呼家人沐浴正衣冠端坐而卒士民祀於邑之北關

葉志

○郭琇字瑞卿卽墨人康熙九年進士十八年來知吳江爲政
明敏果決不畏權勢能除積弊往時條折銀欠者苦差催騷
擾納者被姦胥包攬琇造十限版串戶爲一連令民依限自
輸卽如數截給爲憑又置等縣門令民自稱投櫃銀一兩加
耗五分其欠多者令里書抱木皂往催少者專用長單催而

不輸乃量數笞責由是民無雜費而銀恒得全輸凡積盜倚
豪強爲窟穴者悉擒致伏法院吏逋糧庭見不跪立呼大杖
扑之總督楊捷嘗遣把總至縣督修戰船大索賂遺縛縣吏
於舟琇往諭不聽且出不遜言遂批其頰墜之水中知府某
數求餽賂不得則強屬以枉法事且威脇之琇憤曰吾豈作
此盜賊事卒不從民以訟至者片言立斷無遁情知吳江八
年其才幹他州縣官無及者自湯斌巡撫江蘇後廉聲更大
著遂特薦於朝擢御史前後劾罷大臣之不法者十餘人
不三年爲左都御史爲忌者所中罷歸三十八年

上南巡過吳江萬民跪兩岸迎 駕侍臣傳 旨問前郭琇居

官如何齊聲連奏曰好及 駕回復擢湖廣總督後以疾乞歸卒

○趙軒臨字漢策蕭山人由吏員歷丞尉雍正九年署吳江知縣三歲稱職為真軒臨為吏廉明杜請謁絕饋遺徵科有法辦漕四載粒米無所私聽訟必使民先盡所欲言而後折之黠者無不允服治重案亦不輕用刑訊明令兩造至前口誦讞語吏侍立疾書不得一字增減改易上官以其能凡隣邑有獄不決輒令治之嘗連決太倉吳縣疑獄後訊南漚命案時值溽暑獄辭詭變連五晝夜始成讞至獄具已致危疾歸署兩日卒

以上俱吳江新志

歷代教職

宋

胡瑗字翼之海陵人景祐初范仲淹知蘇州奏請立學延瑗為教授瑗以經術首居師席英才雜遝自遠而至其後登科名者甚眾瑗常患隋唐以來仕進尚文辭而遺經業苟趨利祿及教授蘇湖嚴條約以身先之雖大暑必公服以見諸生設師弟子之禮解經至有要義懇懇為諸生言其所以治已而後治乎人者學徒千數日月刮磨為文章皆傳經誼必以理勝信其師說敦尚行實從遊者郡人滕甫范純仁錢藻皆知

名當世云

盧志 按盧所言蓋本中吳紀聞而潤色之者宋史本傳不載

王逢字會之當塗人博學能文尤長於講說少舉進士不中去
教授蘇州學者常數百人宋史

陳公輔字國佐臨海人政和三年上舍及第調平江府教授時
朱勔方嬖倖當官者奴事之公輔絕不與交勔有兄喪諸生

欲往弔公輔不予告勔不悅諷權要移公輔越州高宗時累
遷左司諫論事剴切疾惡如讐宋史

吳祥字守約麗水人登第為蘇州教授獨不求謁朱勔終提舉
福建路茶事居官以廉稱歷仕四十年無宅以庇風雨盧志

仲并字彌性江都人幼好學強記讀書率至夜漏盡每一徧即
終身不忘登紹興二年進士第授平江教授以朱勝非薦行

改左承奉郎歷光祿寺丞知蘄州官至朝請大夫所著浮山

集十六卷盧志

陳造字唐卿高郵人淳熙二年進士調繁昌尉改平江教授士
子未之知也及被教養咸服其問學議論恨師承之不早范

成大尤愛其文謂龔頤正曰唐卿亦高郵人使遇歐蘇盛名
當不在少游下歷知定海縣房州通判浙西參議又改淮東

未赴卒自號江湖長翁時人稱為淮南夫子盧志
倪千里字起萬東陽人淳熙十四年進士紹熙癸丑任蘇學教

授因其羨積以增養士員復作義廩以資禮文之費其餘以
助士貧而親不能葬與孤孩之遺棄者刻諸學宮條目井然

戴溪黃由葉適為題於後咸紀其事姑蘇志

李大有字謙仲東陽人慶元二年進士授潭州益陽主簿改平

江府教授著錄公明不可干以私正歲率鄉之大夫士正齒

位倣古鄉飲酒禮講行之復取前賢鄉約鄉儀風示學者習

俗用勸知府趙希懌將舉大有或請叩之辭曰求而得之則

不如勿得改知閩縣歷太常主簿遷博士官至朝請郎盧志

江泰亨紹定閒任平江教授先是學田隸常熟者千六百九十

畝沒於豪右僅存什六歷數教官不能直泰亨聞於郡守林

介章良朋司馬述盡得追復且收所負積賦錢三百五十萬

有奇充修學宮費士類懽舞王煥如蘇學景賢錄

史蒙卿字景正鄞人司封郎中贈少師彌鞏之孫通春秋周禮

兼詞賦能默誦五經咸淳初進士廸功郎復州竟陵主簿調

穿山鹽場十年改江陰教授復改平江國亡不仕自號靜清

處士學者稱果齋先生盧志

元

李淦字性學盱江人先任揚州路學正奏尚書右丞葉李舉桑

哥之罪元貞初改平江路教授淦考宋儒朱熹釋奠釋菜禮

製金缶竹木祭器一千七百有四至後任教職方文豹至淦

猶與之僂力竣工作記劄石以去

陳伯延祐五年任平江教授克巳自勵敏於應事先是學田歲

入悉以贍士恒患不足伯在任四年充然有餘惠聲冠於江
左董修廟學尤極精整以上皆蘇學景賢錄

盛德瑞字祥父其先江陰人少孤鞠於祖母始冠徙居崑山以
周易教授閭里至正中聘入郡庠為訓導歷事十年教授之
績紀於學徒繼而遜居田野游心元微與時消息著易辨五

卷方鵬崑山志

明

貢穎之宣城人故元學正洪武二年改教授時兵革乍息禮制
未備穎之盡力經畫以師模感動知府魏觀修廢舉墜學政
一新

張守忠字大本崑山人通春秋登元至元十三年鄉薦洪武初
訓導郡學弟子不遠千里負笈來從

王鳴吉名謙以字行洪武初聘為常熟州學訓導同時有王達
王進德馮章甫吳乾者皆蘇人並任訓導以才行著名鳴吉
尋陞本府儒學教授

林岳字魯瞻莆田人建文元年舉鄉貢尋授蘇州府學訓導九
載秩滿諸生詣闕乞留又九載陞程鄉教諭丁外艱服闋補
仁化移疾致仕岳簡約自持冬夏一裘一葛瓶無儲粟日飯
蔬食遇良辰美景攜朋出游詩文敏速兼精書法

袁銘字德新嘉定人生於元季隱居東海倡明春秋學得申屠

蘇州府志 卷四十一
仲權之傳永樂初舉經明行修除本府訓導與鄭閎同爲經
生所宗乙酉同考應天鄉試所得士皆碩儒在學逾九載將
遷卒

陳孟浩新淦人永樂十六年進士除長沙府學教授二十二年
加秩改蘇州府三載考績巡撫侍郎周忱疏留再加秩仍掌
學事宣德六年引年致仕著有淡菴歸樂二橐初蘇學傾廢
泮池方池二橋並伐木爲架歲常朽腐欲易以石難於經費
孟浩乃先建泮橋自捐俸薪一年而訓導馬壽錢紳韓陽繼
之不日工成旣白於巡撫御史陳敏公私措處得米粟金錢
無算築石梁於方池上兩橋位置精整增飾先聖先賢廟貌

胡槩金幼孜各有記

韓陽字伯陽山陰人永樂丁酉以春秋魁省試初授松江府學
訓導調蘇州其教士有成業譽望日起聘江西鄉試所錄皆
名士尋轉丹陽教諭召拜御史官至廣東左布政使

劉諭字體信泰和人登永樂丁酉鄉舉宣德癸酉中副榜授樂
安教諭親喪服闋改蕭山遷蘇學教授諭深於經術每日爲
諸生校課夜令宿齋舍猶爲講解疑義語人必以禮義爲先
郡守重其師道入學必與備賓主禮暇則詩篇相倡和提學
憲臣亦不以屬官遇之天順三年致事歸

李謨字君定黃岩人正統辛酉舉於鄉明年會試中副榜授蘇

州訓導謨自守過嚴諸生執贄請見峻拒不納有吳江莫鉉取古畫時苗留犢圖乞尚書楊翥題其上以贈之謨曰苟如此使我爲市名矣錄其詩而返之

黎擴字大量臨川人正統初由賢良舉除池州府學訓導遷西安教諭歷聘分考應天主試閩粵天順間再轉蘇州教授學者聽其講議如坐春風中較錄諸士云吾門英俊雖多惟吳寬當魁天下卒如其言

林智字若濬莆田人正統九年鄉舉授宜興訓導每旦坐齋中課諸生至夜方休歷九載遷銅梁教諭以憂去服除提學御史陳選薦智自代吏部泥以資格擬注劇縣智力辭葉盛爲

左侍郎素高其行成化八年陞蘇州府學教授九載滿諸生詣巡撫懇留再仕而智請老歸矣智歷教職三十年所至作人爲多在蘇課士得王鏊卷評爲鄧林一枝果擢鄉會第一張憲字廷式餘干人少從吳與弼講學母喪廬墓瑞竹叢生景泰丙子以春秋魁省試明年會試登乙科授湖廣桃源訓導尋以父憂去服除改蘇州訓導日坐齋舍集諸生講格致誠正修齊治平之道考藝獨賞賀恩果發解首兩典四川湖廣鄉試操持嚴謹一時清譽冠天下九年考績遷國子學錄胡經安福人成化十年由鄉舉授蘇學訓導勵廉介善教人士大夫道其行誼不置陽武訓導長洲陳頎爲作小錄以傳越

二年以母喪去學生朱文輩哭而送之江滸

李一寧字應坤東莞人正德丁卯舉於鄉除雞澤教諭提學御
史王應鵬檄掌漳川書院清苦服勤士習嚮化遷蘇州教授
務以身帥先不事表暴後知淮寧縣卒於官貧無以殮士民
哀之

錢德洪名寬字德洪後以字行改字洪甫餘姚人從王守仁學
嘉靖壬午舉於鄉丙戌試禮部上第引疾歸卒業門牆戊子
北上聞師訃而返壬辰始應殿試又以親老乞恩便養得教
授蘇州至則定祀典申學規日坐道山開講學者翕然而興
有舞雩沂水之風外庠士皆儼學傍舍以居來聽陽明身心

之學乙未丁內艱去累官刑部郎中學者稱緒山先生

翟表字立之江夏人正德己卯鄉舉署江津教諭遷慶雲知縣
嘉靖丙申改蘇州教授二載丁母憂復除松江教授又二載
引疾歸表喜讀書善著述所在造士並有成績貧者授餐或
助資婚配議論抗直鄉人畏其月旦遠近稱為魯湖先生

皆景
賢錄

吳來鳳字儀舜廬陵人嘉靖二十三年鄉舉任蘇州教授性雅
澹清淳勢利不入其念其職教事一以至誠道義諸生皆慕
服時學署池中生蓮一莖雙葩蘇人以為德感諸生周天球
為文以紀盛事陞國子博士尋以母艱去服闋不復仕卒於

家貧不能葬鄉人悼之王志堅府志稿

陳琦字仲玉丹徒人世稱篋石先生以明經選滁州訓導陞蘇州教授修學志置科第貢選題名葺道山亭樹楔繚垣悉捐月俸充費不靡公帑祭器樂器尊經閣書籍舊散置者盡櫝藏之追復學田圃地正士習嚴考課却貧生贄未一載吏部以非甲榜令改他官遂歸不出景賢錄

本朝

○程邑字翼蒼江寧人順治壬辰進士選庶吉士十三年出為蘇州教授郡學自鼎革以來屢為兵馬蹂躪堂廡悉毀祭器圖籍俱散軼邑力為修葺復舊按古器式製籩豆簠簋整樂

器造舞衣春秋丁祭觀禮者稱盛事入令諸生人植桃五株花時諷咏其間康熙二年陞國子助教纂修國史尋卒舊府志

以上郡學

元

錢良佑字翼之長洲人姑蘇志作吳縣人至大間署吳縣學教諭諸生

咸稟約束言行不踰矩矱既代輒不復出自稱江村民餘詳見人物

明

陳道曾字端誠性資朴茂邃於易旁及諸經子史有文名操行卓然登永樂戊戌進士選庶吉士自陳授吳縣學教諭陞瑞

州教授遷無爲州學正所至以師道自重嘗充湖廣浙江山西考官並以公明稱卒於官所著有吳下集筠陽濡須等集

舊縣志

甘澤字仁夫蘄州人弘治七年任吳縣訓導敷教有才甄別人物而誘掖之非公服不接見生徒不苟言笑暇則扁署讀書踰分事纖末不與時初設太倉州師儒難其人提學御史方誌薦陞學正終鎮江教授

舊縣志

袁春豐城人弘治中以舉人署吳縣教諭振舉學規不受束脩由是青衿充滿黌舍故事師生皆會饕遂舉行之日就諸生同食其有情者必罰無所私一歲進新生三十人齋長爲斂

百金以饋悉却不納獻名數亦揮之曰此亦不必聞自是無敢有私餉者居六載清操愈堅以憂去遂不復仕

王志堅府志稿

本朝

○夏鼎字象也江浦人明崇禎癸酉鄉舉順治十年爲吳縣教諭勤於課士修整學宮督捕廳猾胥侵占學基伐樹築室鼎申巡撫督學卒按其罪毀其居基址遂清十四年攝長洲縣

篆以事去官

吳縣新志

以上吳縣學

元

黃季倫鄱陽人長洲教諭楊維楨修學記稱其有文學治才爲

郡守蕭侯所敬禮

明

周岐鳳初名鳴岐以字行廬陵人洪武間以儒士授桐城司訓

改任長洲歷太學教諭兵部員外郎作新髦士以身為教祀

名宦

以上俱舊府志

聶大年字壽卿臨川人博通經史攻詩古文用薦授長洲仁和

教官景泰六年徵詣翰林修實錄卒於京師

列朝詩集

彭道字貴三廬陵人成化間貢士初任吳縣教諭改長洲清操

篤行有石刻遺像祀名宦

舊縣志

本朝

○侯文熿字浴日無錫人康熙甲子科舉人授長洲教諭為人

廉正有任事四十八年歲饑郡中設廠施粥分曹董其事各

廠就食少而米常不給文熿所董就食獨多而常餘米明年

大疫民死相枕藉時知府陳鵬年循行四境惟文熿從往每

戶親問至手調湯藥全活無算辛卯同考浙江鄉試所薦拔

皆孤寒竟以勞成疾卒

以上長洲縣學

元

孔淵字世陞宣聖五十三代孫六世祖端越為宋顯武大夫隨

高宗南渡至淵父敬為通州監稅淵由通之崇明徙家崑山

延祐元年州治遷太倉新作學宮淵多所經畫遂攝學事其
學行修治爲士林所宗號莘野先生子克讓孫世學皆有文
行克世其家

王夢聲字應甫號古川其先分水人宋司諫縉之後夢聲咸淳
進士授廸功郎秘書省檢閱致仕至元復起任崑山州學正
因家湖川塘時兵燹之餘學宮傾圮夢聲捐已貲爲經營之
今瑯琊之族皆其後也

明

陳潛夫字振祖錢塘人徙居崑山性端方善訓迪洪武六年聘
授縣學訓導登其門者多成偉器著述甚多惜散佚無傳後

陞國子學正上獎直臣簡師儒勵廉耻審用人四事上嘉納
之

林鍾字仲鏞杭州人洪武二十年授崑山學訓導接引後進惟
恐不及諸生翕然宗之每相語曰見林先生覺意表言外別
有箴規鍾亦樂崑土風卜居鬻序之左自號松谷道人會上
臨軒選士和得賢才詩稱旨擢湖廣慈利知縣永樂初擢吏
部考功郎拜山東參政後以唐賽兒反坐失察死

朱冕字士章嘉興人正統初爲崑山學教諭性剛毅方正其教先
嚴立條約以示必守諸生朝夕升堂衣冠步趨必整每夜闌
學舍中呶唔聲猶相屬冕時秉燭叩門與語以察勤惰數載

化行取魏科者相踵如鄭文康葉盛陳銓次第掄魁巡撫周
 文襄公巡歷至崑將登岸怒撻一人冕進曰請公息怒至衙
 門治之文襄從之召問其故冕曰下車之始觀瞻所繫恐因
 怒傷人累盛德耳文襄謝焉已而設太倉鎮海衛學因薦為
 教授謂兩衛官曰我為爾子弟得一良師宜隆重之學者稱
 鹵庵先生葉文莊公表其墓

以上俱
縣志

張倬字士昭山陰人正統間以鄉舉分教崑山時年尚少為師
 儒益嚴禮範事之有裨風化者必毅然主行之擢知閩縣卒
 倬自少穎悟篤學為文法秦漢詩備諸家體裁所著有毅齋

集二十卷筆錄十卷

王志堅
府志稿

張汝才字孟德化州人嘉靖甲寅為崑山訓導甫至會倭警與
 知縣祝乾壽晝夜巡守耳後中一矢拔而投之獲一間諜以
 徇城上督守益堅閱月寇退後歲比不登諸生多困汝才每
 周給之擇其尤貧者棲之廡下日飲食之而齋厨索然矣後
 擢興安諭遂挾空囊為萬里行諸生勒石頌之

縣志

沈應奎字伯和武進人萬歷辛丑以鄉舉署崑山教諭應奎故
 宿學崑士雅聞其名至則翕然宗之其教人不出制舉義曰
 士人先資之信在是也然皆原本經術士亦不覺入其彀中
 獎拔後進孜孜不倦聞人一善喜動顏色惟恐其不即知名
 也歸氏家人之子有為青衿者侮其主學使者有所先入欲

庶之應奎爭之力至欲解官去後卒賴其力得正法凡諸生無養貧無葬舍館無定孤貧不能奮於學節烈不能表於世者多方思濟之遷南京國子助教後知裕州進刑部員外郎出知汀州府皆有善政年八十餘卒

王志堅府志稿

洪應紹字念卿歙縣人天啓乙丑以舉人署崑學教諭廉靜端厚諸生有過引之私署正言責之令悔改終不暴其惡遇有爭執善爲停平有以金謝者受而散之貧生有顯者斂怨積年及敗邑人羣起爲難顯者意甘心兩生時其力猶能役使當道所以逼脇應紹者百端卒不爲動崑人服其識力無何卒於任所著有四書詩易解又有道德楞嚴圓覺金剛銓釋

及定不定數諸書

王志堅府志稿

以上崑山縣學

明

趙永言黃巖人宣德九年任常熟教諭巖怨相兼多所造就九載奏績邑人錢汝周輩繪南浦秋帆圖賦詩贈別御史章珪素慎許可特爲序其端

劉文詔安福人正德十四年以舉人任常熟教諭又呂尚古靈寶舉人嘉靖二十年任教諭汪元臣字士元錢塘舉人嘉靖四十一年任教諭三人皆學行純粹勤於造士邑人趙用賢爲作三先生遺澤碑

詹仰聖字惟學麻城人萬歷中以舉人任常熟教諭課士勤懇有負屈者即為白之公庭視躬耿介不可干以私

許成器字道甫寧國人萬歷二十三年以舉人任常熟教諭端方豈弟士無賢不肖俱愛而敬之他如葺號舍建屏牆賑貧乏績亦多可紀

李惟柱字本石京山人舉人萬歷三十七年任教諭釐正學田創輯學志書法宗顏魯公有丐書者欣然操筆氣宇峭直凜

乎難犯以上俱龔立本常熟志

以上常熟縣學

明

梁矩柘城人弘治中舉人署吳江學教諭為人嚴重廉潔諸生

饋遺多却不受至不能自給訓導方文敏有心疾遇長官輒

詈辱之獨見矩愛敬有加未幾被召邑中老幼奔送曰安得

假公為吾民父母乎任終臨洮知府松陵文獻

王惟孝字希舜貴州人嘉靖中以鄉舉署吳江教諭為人壯直

廉潔人不敢犯惓惓以成就人才為務不營私橐諸生貧者

必捐俸賑之擢富陽知縣仕終監察御史王志堅府志稿

蔣弘憲宜興人萬歷中舉人署吳江教諭先是儒學官率俯仰

邑令弘憲謂禮義自學校出且教職非幕僚也議論風采凜

然不撓知縣劉時俊甚重之表醇儒懲敗檢設遷善怙終二

簿以董勸諸生捐俸葺學宮時頰池生雙萼蓮花人皆異焉
稅璫泊舟郵亭固要長吏跪弘憲集諸生將逐之璫偵知遂
行某生以事見辱於邑典史弘憲詣縣質責典史至學舍長
跪謝乃已其風裁如此葉志

以上吳江縣學

歷代武臣

周

孫武齊人以兵法見吳王闔廬王以為將西破楚入郢北威齊

晉顯名諸侯武與有力焉

史記

晉

劉牢之字道堅彭城人孫恩之亂都督吳郡諸軍事使參軍劉
裕討平之

五代

孫瑒臨海人為吳越將守蘇州梁開平三年四月淮南兵圍蘇
州推洞屋攻城瑒置輪於竿首垂繩投錐以搗之攻者盡露
礮至則張網以拒之淮南人不能克吳越王遣牙內指揮使
錢鏐行軍副使杜建徽等將兵救之辛亥吳越兵內外合擊
淮南兵大破之擒其將何朗等三十餘人奪戰艦二百艘又
追敗之于皇天蕩資治通鑑

宋

侍其曙字景昇舉進士不第以父任為殿前承旨咸平中以閣門祇候為蘇杭湖秀等州都巡檢遷左侍禁領東西排岸司曙沈敏有幹略善論利害事朝廷數任使之

宋史

王志堅曰舊志南宋武臣首為張俊立傳考正史建炎平江之破俊在城中引兵遁往崑山坐視蘇人屠戮如胡越然功過相準似不足贖今刪去猶著之以為人臣不忠者之戒

辛永宗明州觀察使為浙西馬步軍副總管平江駐劄紹興十四年御史中丞李文會言建寧軍承宣使解潛本趙鼎客不從和議及和議之效既著居常不樂永宗撰造言語變亂是非二人守官寄居皆在平江衝要之地倡為異說恐使命傳聞失實旋致疑惑誠為未便詔永宗移湖南副總管潛責濠

州團練副使南安軍安置

盧志

李寶河北人嘗陷金國拔身從海道來歸紹興三十一年金亮將繇海道襲浙江諜聞高宗謂宰臣曰李寶以一介脫身還朝陛對無一毫沮懾是必能事者乃授浙西路馬步軍副總管駐劄平江令與守臣督舟捍禦高宗問舟幾何曰堅全可涉風濤者百二十艘兵幾何曰僅三千皆閩浙弓弩手非正兵也旗幟甲杖亦麤備事急矣臣願亟發賜寶衣帶鞍馬尚方弓刀戈甲及銀絹萬數八月次江陰先遣其子公佐伺敵虛實與將官邊士寧偕往寶將啓行軍士爭言西北風尚勁寶下令敢沮大計者斬遂發蘇州大洋行三日風甚惡慷慨

顧左右曰天以是試李寶邪寶心如鐵石不變矣酌酒自誓
風卽止明日舟散復集將官士寧自密州回言公佐已挾魏
勝得海州寶喜士氣百倍抵東海敵已圍海州麾兵登岸以
劍畫地令曰此非復吾境力戰與否在汝等將士賈勇無不
一當十勝出城迎寶遣辯者四出招納降附聲振山東豪傑
如王世修輩各集義勇爭應援多者數萬人大破北軍於膠
西石臼島俘漢軍三千斬其帥完顏鄭家奴者六人獲符印
文書器糧以萬計還軍駐東海遣使報捷上喜曰朕用李寶
果立功爲天下倡矣詔獎諭御書忠勇李寶四字表其旗幟
除靜海軍節度使沿海制置使賜金器玉帶亮聞膠西之敗

大怒名諸帥約三日渡江於是內變殺亮寶戰具精利宰臣

陳康伯取其長槍克敵弓弩俾所司爲式製之卒贈檢校少

保宋

王易河南人以故將子從高宗南渡紹興中爲浙西總管平江

駐劄性開爽善屬文爲御前應制眷倚甚厚嘗遇異人授先

天數學成壞皆前知

盧志

開趙淳熙中武功大夫英州刺史添差浙西總管平江駐劄嘗

取肝救父詔曰開趙昔忠于國今孝于親特轉濮州團練副

使初趙奏歸正人在東南有貧不能葬者已于閭門買地作

義墳詔從其請及趙卒亦葬此

盧志

蘇州府志 卷四十一
王安節節度使堅之子咸淳末爲東南第七副將德祐初賈似
道潰師蕪湖安節上疏乞募兵爲捍禦授閣門祇候浙西添
差兵馬副都監收兵入平江合張世傑兵戰鳳凰港有功轉
三官後守常州與元兵巷戰死之宋史

元

審玉河陽人身長九尺膂力絕人從伯顏下江南擢領軍千戶
鎮守吳江長橋累官至浙西道都元帥時方勸吳人賴其
保障之功復新孔廟學宮禮賢下士有古良將風卒謚武宣

子孫後居吳江同里

姑蘇志


明

吳良定遠人先爲指揮使守江陰屢敗張士誠兵吳平加昭勇
大將軍蘇州衛指揮使移鎮蘇州武備益修軍民輯睦進都
督僉事移守全州明史

俞大猷字志輔晉江人嘉靖中以備倭都指揮屢敗倭賊於浙
東代湯克寬爲蘇松副總兵倭屯松江柘林從總督張經大
破賊於王江涇功爲趙文華胡宗憲所攘不敘繼而新倭三
十餘艘突青村所與南沙小烏口浪港諸賊合犯蘇州陸涇
壩直抵婁門敗南京都督周于德兵賊復分爲二北掠澣墅
南掠橫塘延蔓常熟江陰無錫之境出入太湖大猷偕副使
任環大敗賊陸涇壩焚舟三十餘又遮擊其自三丈浦出海

者沈七艘賊乃退泊三板沙頃之他倭犯吳江大猷及環又
 邀破之鶯脰湖賊走嘉興三板沙掠民舟將遁大猷追擊於
 馬蹟山禽其魁金涇許浦白茆港賊俱出海大猷追擊於茶
 山焚其舟後屢破倭進總兵官三十五年冬以與平徐海功
 加都督僉事

明史



蘇州府志卷四十六

文化乙丑

人

